

**NATIONAL ASSEMBLY OF
SEYCHELLES**

Thursday 31st October

2024

The Assembly met at 9 am

National Anthem

Moment of Reflection

Mr Speaker in the Chair

MR SPEAKER

Bonzour tou nou Manm Onorab. Bonzour nou bann zofisyé Lasanble ki pe asiste nou e nou piblik ki pe ekout nou deor. Mersi pou zot latansyon. Ozordi nou item lo *Order Paper i Appropriation Bill, 2025* byen koni koman Ladres Bidze. Mon a demann *Hansard* raporter pou apel Minis e son bann zofisyé.

Bonzour Minis pou Plan Nasyonal e Komers, Mr Naadir Hassan e Patrick Payet *Secretary of State* dan sa Minister; Ms Astride Tamatave – Sekreter Prensipal pou Finans e Jude Commettant Sekreter Zeneral pour Finans ; byenveni dan Lasanble pou partisip avek nou dan sa Bill - *Appropriation Bill, 2025*.

Nou a ganny Mosyon pou *Second Reading* silvouple?

HON BERNARD GEORGES

Bonzour Mr Speaker. Bonzour Minis avek ou delegasyon ; bonzour tou bann koleg Onorab e tou dimoun ki pe swiv nou. Mr Speaker, annakor avek *Order 69(2)* nou *Standing Orders*, i fer mwan en gran loner e donn mwan en gran plezir pou move ki *the Appropriation Bill, 2025* i ganny lir en Dezyenm Fwa. Mersi.

MR SPEAKER

Mersi Onorab Georges. Nou a ganny segonnman? Onorab Sandy Arissol?

HON SANDY ARISSOL

Mersi Mr Speaker. Bonzour Mr Speaker. Bonzour Minis avek ou lekip. Bonzour tou Manm Lasanble Nasyonal, tou dimoun ki a lekout. Mosyon i ganny segonde. Mersi.

MR SPEAKER

Mersi Onorab. Minis, nou pare pou ekout ou pou ou Ladres lo *Appropriation Bill, 2025*.

MINISTER NAADIR HASSAN

Mr Speaker,
Dirizan Lopoziyon,
Dirizan Zafer Gouvernman,
Tou bann Manm Onorab e
Tou dimoun a lekout,

Bonzour.

1. Lentrodiksyon

Mr Speaker, Bidze 2025, i senkyenm Bidze ki sa Ladministrasyon i prezante devan Lasanble Nasyonal pour laprouvasyon depi ki in antre dan Gouvernman an Oktob 2020. Anvi ki sa i dernyen Bidze dan sa manda, i enportan pour mwan fer rapel tou dimoun lo bann lobzektif prensipal sa Gouvernman ler i ti prezant son premye Bidze an 2021. Sa ti lans son program pour sa 5 an dan son premye manda.

Mon ti komans mon diskour Bidze 2021 avek sa deklarasyon e mon site "I bon note ki sa nouvo Gouvernman in pran ansarz sa pei dan enn son moman pli difisil dan son listwar. Me kanmenm sa, nou determinen e mon asire, ki nou pei pou sirviv tou sa bann defi. Me nou pa pou zis sirviv, me osi pozisyonn li dan en pli bon fason pou relanse e prospere".

Mr Speaker, ozordi i moman apropiye pour nou reflekte lo sa deklarasyon. Wi, mon kapab konfirmen ki nou'n sirviv, e nou pe menm fer pli byen. Dan bann Bidze presedan dan sa bann dernyen lannen nou'n kapab amelyor bokou benefis pour nou pei e nou pep e menm entrodwir nouvo

linisyativ ki pou anmenn nou pei devan e anmenn plis benefis. Nou lekonomi in rekipere e avek stabilite makro ekonomik ki'n ganny re-etabli, sa in permet nou pou retourn bann benefis kot nou pep.

Mr Speaker, mon menm kapab dir ki bokou nou in menm fini bliye ki sa sityasyon grav nou lekonomi e pei ti ladan. Sa dan limenm i laprev sa sikse ki nou'n pas atraver. COVID ti'n met nou lekonomi lo son zenou. Avek en lekonomi ki ti dan resesyon e sityasyon finansyel Gouvernman ki pa ti dan en bon kondisyon nou ti lo en presipis.

Me, ozordi nou dan en sityasyon kot nou kapab prezant pli gro Bidze dan listwar Sesel.

(APPLAUSE)

MINISTER NAADIR HASSAN

Mr Speaker, sa in arive dan mwens ki 5 an. En Bidze ki donn ek nou pep benefis nou travay e osi met disponib larzan pou investir dan lenfrastruktir ekonomik ek sosyal ki a benefisye nou pei pour sa bann lannen e deseni ki pe vini.

Sa Mr Speaker, i selman kapab arive ler i annan en Gouvernman ki responsab e ki annan en plan stratezik. Me pli

enportan en Gouvernman ki fermeman krwar dan abilite son bann teknisyen pou delivre.

Mr Speaker, les mwan fer rapel tou dimoun realite 2020 avek bann sif.

□ Lekonomi ti'n regrese par 7.7%

□ Defisit Fiskal Primer ti; 15.1% nou Prodwi Domestik Brit (*GDP*)

□ Valer rounpi ti'n devalye konpare avek lezot lamonnen prensipal – Pour en 1 dolar ou ti bezwen plis ki SR22 – 1 Ero ti plis ki SR26 e 1 Liv Sterlen ti pros SR29.

□ Avek lakantite touris ki ti'n desann, reveni direk ki pei ti ganyen avek sa lendistri, ti selman \$221 milyon, en rediksyon 62%.

□ Dan son evalyasyon a lafen lannen 2020, *Fitch Rating* ti degrad pozisyon nou pei sorti 'BB' komansman lannen pou ariv 'B', aköz det pei ti pe ariv lo en staz ki ti nepli soutenab.

□ Ver milye 2021 to lenflasyon ti'n ariv an mwayenn par lao 11%.

□ Reveni total ki Gouvernman ti kolekte lafen 2020 ti apepre SR 7.6 bilyon.

□ Me par kont, depans total Gouvernman, ansanm avek '*net lending*', ekskli lentere, ti ariv en pti pe plis ki SR 10.9 bilyon.

□ En total defisit primer SR 3.3 bilyon.

□ Nou det total baze lo revizyon *GDP* ti 80.8%.

Avek en sityasyon finansyel parey Gouvernman ti'n pran li plis det. Nou statistik ofisyel i montre ki zis an 2020 tousel, det total ki Gouvernman ti pran ti plis ki SR7.5 bilyon, sa i enkli det domestik ek eksteryer.

Mr Speaker, vwala vre sityasyon ekonomik ek finansyel pei an 2020. I enportan pour nou pa zanmen oublie kote nou ti ete, e ki mannyer sityasyon ti kritik, ler nou ti vin o pouvwar. Nou pa'n zanmen kasyet realite avek lepep Seselwa. Sa de premye lannen apre nou ti vin o pouvwar, ti vremen difisil e enkyetan pour Gouvernman, aköz toulezour, nou ti pe rode ki mannyer pou fer fas avek sa pandemik *COVID 19*, e anmenmtan relans nou lekonomi. 4

Desizyon brav ti ganny pran pou vaksin nou popilasyon e re-ouver lafrontyer pei an Mars 2021. Sa ti le sel fason pou retourn nou lekonomi lo semen prodiktivite.

Mr Speaker, tou desizyon ki nou Gouvernman in pran ziska la, in fer li dan lentere tou dimoun, biznes e nou pei. I pour sa rezon ki nou premye Bidze an 2021, ti enn baze lo

met fondasyon pou anmenn transformasyon dan nou fason fer, e asire ki nou sityasyon finansyel i revin stab e ki nou det pei i retourn lo en semen soutenabilite. Sa fondasyon i kontinyen reste labaz okenn Bidze ki nou Gouvernman pou prepare.

Alors, ki aksyon ki nou'n pran koman en Gouvernman ziska la, pou retir nou pei dan sa difikilte ki i ti ladan e siport nou popilasyon?

Mr Speaker, nou'n aplik en polisi bidzeter strikt. Nou'n reste disiplinen e responsab a tou moman. Eski sa bann mezir ti toultan popiler? *NON!* Eski sa bann mezir ti neserer e enportan? *WI!* Sa ki mon kapab reasir tou Seselwa se si sa bann mezir pa ti'n ganny pran, nou pei Sesel ti pou dan en sityasyon kritik parey nou'n war arive dan plizyer pei.

Mon oule osi reasir tou Seselwa ki pandan sa dernyen katran nou pann zis kontrol depans. Ler sa bann mezir in konmans raport fri, nou'n partaze e sa nou'n fer li avek tou kous nou sosyete – ki enkli sektèr biznes, etidyan, travayer e osi sa ki bezwen plis sipor atraver bann program benefis sosyal. Nou'n kontinyen fer devlopman lo nivo distrik, e envestir dan lenfrastriktir.

Nou'n distribye sa sikse avek bann diferan group sakenn a son tour.

Mr Speaker, pour nou reisir fer tousala, nou'n bezwen redres nou lekonomi ek sityasyon finansyel.

Ozordi, nou sityasyon i konm swivan:

□ Lekonomi i ekspekte agrandi par 3% lafen 2024.

□ Bidze pei i nepli dan defisit, me plito nou pe prozekte pou fer en sirplis fiskal primer 1.1% pour sa lannen.

□ Nou ekspekte fini lannen avek en det total 61.5% nou *GDP*.

□ Valer roudi in apresye kont bann deviz etranzer e stabilize.

□ Lakantite reveni ki nou'n kolekte avek lendistri tourizm a lafen 2023 ti \$989 milyon.

□ Ozordi, *Fitch Rating* in reviz nou pozisyon, e nou pou fini lannen avek en '*rating*' '*BB-, Outlook Positive*'. Pli bon pozisyon ki nou'n deza gannnen.

(APPLAUSE)

MINISTER NAADIR HASSAN

□ A lafen 2024, nou pe ekspekte kolekte en total reveni pou SR10.9 bilyon. Pli o ki nou'n deza kolekte.

(APPLAUSE)

MINISTER NAADIR HASSAN

□ Depans total Gouvernman an 2024, ansanm avek '*net lending*', ekskli lenter, i ekspekte ariv SR10.5 bilyon. Sa bon rezilta ki mon'n fek site Mr Speaker, i rezilta travay dir tou dimoun, en pep rezilyan e matir, ki'n konpran ler Gouvernman ti bezwen pran bann aksyon disiplin e responsab pou retourn nou pei lo bon semen.

Ozordi dan sa senkyenm Bidze, Mr Speaker, nou pou kontinyen rekonpans nou pep, baze lo nou abilite Bidzeter, aköz nou lekonomi i ankor pe fer byen, malgre bann defi mondyal ki toultan reste en konsern pour nou. Me sa Bidze Mr Speaker, i osi met fondasyon pour nou lekonomi kontinyen agrandir e sa i vedir ki a kree plis larises pour nou sitwayen.

2. Devlopman lo nivo mondyal e Performans Ekonomik Sesel

Mr Speaker, zisteman, ler nou regard aktivite ekonomik lo nivo mondyal pour lannen 2024 menm si i reste rezilyan, konpare avek bann peryod dan lepase, sa i ankor en performans pli ba. Nou touzour pe fer fas avek bann defi ki pe persiste lo kote tansyon politik e osi lo kote polisi monneter. Krwasans mondyal i ekspekte

pou stabilize anviron 3% pour lannen 2024 e 2025. Menm si to lenflasyon pe ralanti, presyon lo pri i reste eleve.

Bann risk prensipal ki nou toultan bezwen pran an kont ki kapab annan lefe advers lo Sesel i sityasyon finansyel lo kote mondyal, lager ant Ikrenn ek Larisi ki pe persiste, konfli dan Mwayenn Oriyan e lefe lenteripsyon dan komers.

Mr Speaker, lo kote domestik, nou ekspekte ki nou lekonomi pou agrandi par 3% an 2024. Sa i baze lo performans sekter tourizm ki'n reste pozitiv avek en ogmantasyon 2% dan larive viziter konpare avek 2023 e nou pe prozekte total viziter pou ariv 357,900. Baze lo sa prozeksyon performans viziter, krwasans i osi pe prozekte dan bann sekter relye avek *tourism* - parey akomodasyon e manze, e osi transportasyon e stokaz. Sa performans pe osi ganny siporte avek sa bon performans dan sekter lenformasyon ek telekominikasyon e osi Sekter Lagrikiltir ek Lapes.

Pour lannen 2025, nou pe prozekte ki lekonomi Sesel pou agrandi par 4.3%. Sa i relye avek en ogmantasyon dan larive viziter par 3.5%, letan nou konsider bann fakter parey levennman '*FIFA Beach Soccer*

World Cup' ki pou fer an Me 2025, e osi bann lotel ki pou re-ouver lannen prosenn. Bann sekter relye avek tourizm, parey akomodasyon e manze e servis administrativ e siport, nou pe prozekte en krwasans 5% e 3% respektivman pour lannen 2025.

Mr Speaker, dan lede sekter - lagrikiltir avek lapas - nou pe prozekte en krwasans 3% an 2025. Dan sekter prodiksyon prodwi pwason, nou pe estimen ki pou annan en krwasans 8% an 2025 e an mwayenn 3% dan mwayen term.

Dan sekter prodiksyon lalkol ek taba, nou pe prozekte en krwasans 4% pour lannen 2025 konpare avek 2% an 2024. Par kont, nou pe estimen ki pou annan en rediksyon 5% dan sekter materyo konstriksyon an 2024. Sa rediksyon i baze lo lenpak leksplozyon ki ti arive le 7 Desanm 2023. Sepandan, nou pe prevwar en relansman 3% dan sa sekter pour lannen 2025.

De lot kote, nou pe kontinyen vwar en krwasans pozitiv dan sekter konstriksyon anvi bann aktivite konstriksyon dan sekter tourizm. Sa krwasans pozitiv pe osi ganny

vwar dan koleksyon reveni dan taks valer azoute pou sekter konstriksyon, ki'n deza sirpas koleksyon antye pour lannen 2023 par 37%. Sa sekter i ekspekte agrandi par 5% an 2025 e 3% dan mwayen term. Sekter distribisyon e '*retail*' pe ekspekte en krwasans 2% an 2024 e 3% an 2025.

Mr Speaker, dan sekter lenformasyon ek telekominikasyon en krwasans 10% pe ganny prozekte pour lannen 2024 e osi an 2025. Statistik pour '*data traffic*' pour premye 6 mwan pandan 2024 in ogmante par 54% konpare avek menm peryod pour 2023. Sa krwasans pe osi ganny siporte avek zefor Gouvernman, pou adopte teknolozi dan son bann servis e osi sa krwasans pozitiv dan sekter tourizm. An mwayen term sa sekter i ekspekte agrandi par 8%.

3. Sekter Monneter :

Mr Speaker, anvi ki lenflasyon lo nivo mondyal in abese pandan lannen, e dan lekonomi domestik to lenflasyon ti tre ba, Labank Santral Sesel in mentenir en polisi monneter akomodativ pou ede siport plis aktivite ekonomik. Dan sa konteks, to Polisi Monneter ti an Avril 2024 ganny redwir sorti 2.0% pour vin 1.75%. An

zeneral, lakantite kredi ki'n ganny donnen an rounpi, e ki'n al anver sekter prive, in ogmante pandan sa lannen.

An Out 2024, lakantite kredi in ogmant par 15% konpare avek Out 2023. Sa i reflekte en lanvironnman pli favorab pour bann biznes.

Mr Speaker, an term devlopman lo marse eksteryer, menm si plizyer labank santral aletranze in fer desann zot to lentere Polisi Monneter, i ankor annan bokou lensertitid relye avek bann tansyon e konfli politik ki kapab enpakte lekonomi domestik lannen prosenn. Alor, Labank Santral pou kontinyen pran kont bann faktor domestik ek eksteryer ler i fer desizyon, pou fer sir ki son polisi monneter i anliny avek son bann lobzektif.

4. Lenflasyon:

Mr Speaker, nivo lenflasyon i ankor vremen ba kot to lenflasyon lo en baz douz mwan ti *negativ* 0.7% an Septanm 2024. Ler nou konpare avek Desanm 2021, pri an zeneral lo en baz douz mwan ti 9.8%. Sa abesman dan nivo lenflasyon depi lafen lannen 2021, ti prensipalman relye avek rediksyon dan pri komodite ek karbiran lo marse enternasyonal, ensi ki en

apresyasyon dan valer rounpi pandan sa menm peryod.

An Septanm 2024, pri an zeneral ti ogmant par 0.6% konpare avek Septanm 2023. An term prozeksyon pour Desanm 2024, lenflasyon i ekspekte a en to 2.5%. Dapre Fon Monneter Enternasyonal, to lenflasyon an mwayenn lo nivo global pou 5.8% e dan bann pei ki pe devlope, i pou 2.6%.

5. Sekter Eksteryer:

Mr Speaker, lo kote sekter eksteryer, dan balans '*current account*', ki rikord valer tranzaksyon ki Sesel i fer avek larestan lemonn, estimasyon preliminar i montre ki sa defisit in sorti 7.2% nou *GDP* an 2023, pou ariv 10.7% an 2024.

Me toudmenm, anliny avek prozeksyon, i ekspekte annan en amelyorasyon dan performans lekonomi an 2025, e sa pou fer ki nivo defisit pou redwir pou vin 9.8% nou *GDP*.

6. Revi lo Performans Fiskal 2024:

Mr Speaker, pour lannen 2024 pozisyon primer fiskal Gouvernman i reste 1.1% nou *GDP* parey prozeksyon inisyale e osi dan revi milye lannen. Nou pe estimen ki reveni total, ki pa

enkli bann don - pou ariv SR 10.54 bilyon konpare avek SR 10.48 bilyon, dan prozeksyon Bidze inisyal pour 2024. Sa i reprezant SR 58.7 milyon an plis ek Bidze inisyal. Total reveni ki osi enkli bann don pour SR 10.9 bilyon, ki ekivalan 35.1% nou *GDP*.

Dan sa SR 10.9 bilyon - i enkli reveni taks ki pour en sonm SR 8.92 bilyon. Sa i SR 17.8 milyon an plis konpare avek sa ki nou ti'n prevwar pandan revy Bidze milye lannen. Nou pe prozekte en ogmantasyon – prensipalman - dan koleksyon taks lo saler e benefis non-monneter par SR 28.7 milyon e taks biznes par SR 24 milyon.

Par kont, nou pe prozekte en rediksyon dan bann laliny taks ki relye ek tourizm, sa i; taks lo valer azoute - par SR 30.9 milyon, taks lanvironnman soutenabilite lo bann viziter - par SR 15.2 milyon e taks lo reveni lotel - par SR 27.4 milyon.

Swivan, legzersis pandan revy milye lannen, Gouvernman ti prezant en Bidze siplemanter SR 473.1 milyon. Sa, ti ganny finanse par en rediksyon dan depans dan Bidze, pour en sonm SR 453.3 milyon e en ogmantasyon selman SR 19.8

milyon dan depans Gouvernman.

Nou ekspekte pou fini lannen 2024 avek en stok det lavaler 61.5% *GDP*. Nou stok i ankor soutenab, e gard nou lo sa semen, ki nou a kapab realiz nou target pou redwir nou det ver 50% avan 2030.

7. Bidze 2025 e Performans Fiskal Mwayen Term:

Mr Speaker, pour lannen 2025, Gouvernman pe propoz en depans SR 11,901,621,045. Sa i reprezant en ogmantasyon 11.9%, ler ou konpar avek '*Appropriation Act*' 2024, ki ti SR 10,640,628,966.

Total reveni ki osi enkli bann don pe ganny prozekte pou ariv SR 12.2 bilyon, ki ekivalan 36.8% nou *GDP*. Alors, sa i fer ki Gouvernman pe prozekte en sirplis primer SR 379.9 milyon ki reprezant 1.1% *GDP*. Dan mwayen term, nou pou kontinyen konsolid nou pozisyon fiskal e fer sir nou kontinyen atenn en sirplis primer ki ava ed nou dan nou target pour redwir nou det.

8. Koleksyon Reveni pour 2025 :

Mr Speaker, dan sa total reveni ki nou pe prozekte pour lannen 2025, SR 9.96 bilyon pou ganny kolekte par bann reveni taks ki

reprézant 85% koleksyon revèni total. Par kont, SR 1.8 bilyon pe ganny prozèkte pou revèni ki pa taks e SR 453 milyon an term don. Sa total i reprézant en ogmantasyon SR 1.3 bilyon oubyen 11.7% lè ou konpar avèk Bidzè revizè pou lannen 2024.

Koleksyon dan revèni taks pe ganny prozèkte pou ogmanter dan taks lo saler e benefis non-monneter par SR 102 milyon. Sa i an rezilta re-ouvertir bann lotèl ki pou kree plis lanplwa e osi ogmantasyon dan saler pou lannen 2025. Nou osi ekspekte en ogmantasyon dan koleksyon revèni dan Taks Biznes - par SR 161.9 milyon ki relye avèk sèkter finansyel an rapò avèk antite '*securities dealers*'. Pou annan en ogmantasyon dan '*Excise*' Taks - par SR 130.3 milyon e Taks Valer Azoute (VAT) - par SR 570.4 milyon ki relye avèk aktivite dan sèkter touzizm.

Koleksyon lezot revèni ki pa taks pou lannen 2025, i ekspekte ogmanter par SR 134.2 milyon. Mazonite sa ogmantasyon pou ganny kolekte koman en '*dividend*' sorti kot IDC baze lo sa lagreman pou '*lease*' zil *Assumption* pou en lavalèr US\$ 20 milyon. Alòs nou pou reflekte SR 301.4 milyon

ogmantasyon dan '*dividend*' sorti kot IDC. Gouvernman pou pret IDC en total SR 105.7 milyon anba depans dan '*net lending*' pou permet li konstrir bann lenfrastriktir nesèser lo sa zil, ki i pou repeye dan mwayen term.

Bann don ki nou pou gannyen i ekspekte ogmanter par apepre SR 98.3 milyon. Dan mwayen term, revèni total ek bann don in prozèkte pou ariv apepre 33% nou '*GDP*'.

9. Labaz Depans Gouvernman: Mr Speaker, pou lannen 2025, Gouvernman i restè angazè pou kontinyelman investir dan nou program sosyal e lenfrastriktir tout an prenan kont nou bann polisi fiskal. Bidzè total pou portfolyo Lanplwa e Zafer Sosyal - ki enkli depans anba bann benefis e program kot Lazans Proteksyon Sosyal i pli gro sonm dan Bidzè 2025 - pou en total SR 1.57 bilyon - ki reprézant 13.2% Bidzè total ki pe ganny propoze. Bidzè portfolyo Lasante pe ganny prozèkte pou en total SR 1.5 bilyon ki reprézant 12.8% Bidzè total. En alokasyon SR 1.4 bilyon pe ganny prozèkte pou portfolyo Ledikasyon ki reprézant 11.8% Bidzè total.

Bidzè byen ek servis i restè pli gro sonm dan Bidzè 2025

avek en total SR 4.05 bilyon, ki reprezant 12.3% *GDP*, konpare avek Bidze revize an 2024 ki reprezant 12.5% *GDP*.

Par kont Mr Speaker, pli gran ogmantasyon i pou en total Bidze SR 1.86 bilyon ki pe ganny prozekte pour lannen 2025, i dan program lenvestisman kapital, ki reprezant 5.6% *GDP*. Sa i reprezant en ogmantasyon SR 473.1 milyon ouswa 34%, konpare avek Bidze revize an 2024. Sa i reflekte priyorite Gouvernman pou konsolid Bidze byen ek servis ki'n ede annan plis lespas fiskal pou investir dan proze kapital.

10. Reminerasyon ek Saler:

Mr Speaker, nou Gouvernman in toultan pare pou redistribye nou sikse ler i kapab, sirtou apre bann moman difisil. I fer sa, baze lo kalkilasyon bidzeter pou asire ki sa redistribisyon i ekitab e soutenab. I pa vo lapenn ki nou redistribye nou larises ler nou konnen ki a lonterm pei pa pou kapab soutenir bann tel aksyon, ki kapab andomaz nou lekonomi e sityasyon finansyel. Nou'n toultan dir ki nou pou toultan azir dan en fason disiplin e responsab.

Depi premye Bidze sa Ladministrasyon, an 2021,

nou'n toultan rod fason pou redonnen ler Bidze i permet. Pour travayer sekter piblik, an Avril 2023, Gouvernman, ti donn en ogmantasyon saler kot zot ti garanti en minimonm SR 1,000 par travayer. Sa ti swiv sa legzersis pou konsolid serten alawenns dan saler, e avek sa konsolidasyon travayer pe osi benefisye plis anver peyman trezyenm mwan.

Mr Speaker, sa revizyon an 2023 ti reprezant en ogmantasyon an mwayenn 10%, e in kout Gouvernman apepre SR 220 milyon an total, par an. Me anmenmtan, nou bezwen konsyan lenpak en ogmantasyon saler, sirtou an term son soutenabilite lonterm lo Bidze pei e lo lenflasyon.

Mr Speaker, Gouvernman i anploy li apepre 11 mil travayer dan sekter piblik, ki reprezant anviron 20% total endividi dan marse lanplwa. Dan Bidze 2025, en sonm SR 3.7 bilyon pe ganny propoze pour reminerasyon ek saler dan servis piblik - en ogmantasyon SR 309 milyon ouswa 9% letan ou konpar avek Bidze revize an 2024. Sa i reprezant 11.3% *GDP* konpare avek 11% dan Bidze revize an 2024.

Mr Speaker, pour 2025, Gouvernman pe propoz en ogmantasyon 7% lo saler de baz

par mwan, pour tou travayer
sekte piblik ki pe ganny par
anba SR21,368. Tou ...

(APPLAUSE)

MINISTER NAADIR HASSAN

Tou travayer ki pe ganny plis ki
SR21,368, zot pou resevwar en
ogmantasyon SR1,500. Sa
ogmantasyon i garanti en
minimom SR500 pour tou
travayer ki travay a plen tan. Sa
ogmantasyon 7% i osi aplik
pour bann ‘*home carer*’. Mr
Speaker, sa limit SR 1,500 i
neseser pou asire ki sa
ogmantasyon saler i reste
soutenab e ekitab. I enportan
note ki sa ogmantasyon saler pa
aplikab pour bann lapwentman
konstitisyonnèl.

Mr Speaker, mon ava
donn 3 legzanp pou ilistre sa
logmantasyon;

□ En ‘*House Keeper*’ son saler
de baz ki pa enkli son alawenns
pou sorti SR 7,343 pou vin SR
7,857

□ En *Staff Nurse* e en
ansennyant, son saler de baz ki
pa enkli son alawenns pou sorti
SR 13,204 pou vin SR 14,128

□ En *graduate* ki konmans lo en
saler de baz SR 16,546 pou
aprezan ganny SR 17,704. Sa
pa enkli okenn alawenns.

Mr Speaker, sa
ogmantasyon dan saler servis
piblik pou pran lefe le 1 Avril
2025 e pe kout SR 115 milyon,
ki reprezant 0.3% *GDP*. Sa
ogmantasyon pou annan en
lenpak anyel SR 153 milyon.

I bon note osi, sa
ogmantasyon i dezyenm dan
lespas zis 2 an ki nou
Gouvernman pe donn travayer
sekte piblik. Nou devret osi
note ki i premye fwa ki
Gouvernman in donn en
logmantasyon saler 2 fwa dan
en en pti dele letan. Mon lapel
avek zot; se avek sa
lenvestisman ki Gouvernman
pe fer anver zot, pou silvouple
perform a en oter ki pou ed
lekonomi agrandi plis e donn en
servis o nivo ki piblik pe
ekspekte.

Mr Speaker, an 2025,
Gouvernman pou komans
lenplimantasyon son Sistenm
Zesyon Resours Imen (*HRMS*),
ki pou kout US\$ 1.7 milyon. Sa
sistenm pou elimin bann
louvraz administrativ mannyel,
redwir letan prosis, redwir
lilizasyon papye, e amelyor
kapasite pran desizyon. Sa
transformasyon pou asir meyer
planifikasyon lafors travayer,
amelyor satisfaksyon nou bann
staff, e permet nou zer resours
avek plis presizyon.

10.1 Ogmantasyon dan saler minimonm:

Mr Speaker, avek devlopman dan lekonomi e prenan kont ki dernyen fwa ki in annan en revizyon dan saler minimonm ti an Zanvye 2020, Gouvernman in war li nesese pou revwar saler minimonm.

Baze lo bon pratik, en revizyon tou le 5 an i nesese pou fer sir ki saler i ganny aziste pou reflekte lenflasyon. Gouvernman i salye bann biznes dan sekter prive ki lo en baz regilye i ogmant saler zot travayer baze lo performans zot biznes. Gouvernman i rekomann bann pratik parey, me nou osi konsyan ki annan biznes ki baz reminerasyon zot travayer pirman lo saler minimonm ki ganny rekomande dan Lalwa Lanplwa.

Mr Speaker, en legzersis in ganny fer pou revwar saler minimonm, e nou pe propoz en ogmantasyon 7%, konm swivan;

□ Sorti SR 38.27 pour vin SR 40.95 par erdtan pour travayer ki ganny anplove. Sa i vedit en travay ki baze lo 40 erdtan par semenn, saler minimonm pou ogmante sorti SR 6,633.47 pour vin SR 7,098 par mwan.

□ To lapey pou bann travayer ki pa anplove a plen tan (*casual*)

pou ogmante sorti SR 44.10 pour vin SR 47.19 par erdtan.

Mr Speaker, Departman lanplwa ansanm avek bann partner kle, pou konmans fer konsiltasyon lo revizyon saler minimonm dan bann prosenn mwan e nou lentansyon se ki okenn ogmantasyon ava pran lefe ver Avril 2025.

11. Sekter Lanplwa :

Mr Speaker, avek propozisyon pou ogmant saler travayer, nou ekspekte ki sa linisyativ i ava ankouraz plis Seselwa pou antre dan en lanplwa formel.

To mank lanplwa nasyonal pour lannen 2023 ti 3% konpare avek 3.9% an 2022. Nou'n osi obzerv en rediksyon sorti 13.7% pour lannen 2022 pour vin 9.5% lannen 2023 dan to mank lanplwa parmi zenn. Sa i demontre progre ki'n ganny fer e Gouvernman pou kontinyen met an plas bann polisi ek mezir pou met plis dimoun dan en lanplwa.

Mr Speaker, en sityasyon ki preokip Gouvernman bokou dan marse lanplwa i sa kantite dimoun, sirtou zonm, ki dan lanplwa enformel. Nou dernyen estimasyon se ki i annan apepre 8,000 endividi ki dan sa sekter. Sa i vedit zot pa pe fer kontribisyon pansyon e zot osi

pa pe benefisye avek serten proteksyon dan lalwa lanplwa.

Departman Lanplwa avek lasistans lorganizasyon enternasyonal, pour travay in fer en letid lo lanplwa enformel dan Sesel e bann desizyon polisi pou ganny konsidere avek diferan partener pour adres rekomandasyon sa resers. Nou rekonnèt ki plizyer endividi ki dan en lanplwa enformel i osi en viktim drog ou lalkol, savedir bann lentervansyon pou osi enkli kolaborasyon avek lezot Minister.

En popilasyon byen edike konsernan loportinite lanplwa, ava ede redwir presyon lo Departman Lanplwa, an sa ki konsern bann diferan program ki zot pe ofer an se moman, swa pou plas dimoun dan lanplwa, oubyen pou donn zot en ‘*skill*’ travay. Depi 2021 a 2023, Departman Lanplwa in plas an mwayenn, apepre 1,600 endividi dan en lanplwa par an.

Mr Speaker, sa departman pe administre 3 program spesyal ki ede met dimoun dan en lanplwa. Sa 3 program i: Devlopman Skill, Mon Premye Louvraz, e ‘*Re-skilling*’. Pour lannen 2025, alokasyon anba sa bann skim i konm swivan; en sonm SR 5 milyon anba Program ‘Mon premye Louvraz.’ Gouvernman pe met

SR 1 milyon adisyonnèl anba program ‘Devlopman *Skill*’ e ‘*re-skilling*’ ki pou kouvertiket bis gratwit pour bann partisipan. An total - SR5.6 milyon pe ganny rekomande anba program ‘devlopman skill’ e ‘*re-skilling*’.

An mwayenn, plis ki 100 dimoun ki ti pe rod en lanplwa ti anrezistre lo program *re-skilling* depi lannen 2021 ziska 2023. Osi, an mwayenn par lannen, plis ki 400 etidyan ki ti konplet zot letid pos segonder ti ganny plase dan en lanplwa atraver program “Mon Premye Louvraz” e; plis ki 300 zenn ti ganny plase lo program ‘Devlopman Skill’ an mwayenn par lannen.

Departman Lanplwa anba son program lokalizasyon, pandan 2021 ziska 2023 in reisir ranplas 81 etranze ki ti dan bann pozisyon lo nivo zesyon e sipervizyon sirtou dan lendistri tourizm par nou Seselwa. Mr Speaker, sa i asire ki Seselwa i ganny loportinite pou avanse dan zot karyer profesyonnel.

Mr Speaker, avek tou sa evolisyon e devlopman ki pe annan dan marse lanplwa dan nou pei, i enportan ki nou annan en Lalwa Lanplwa ki modern e ki reflekte larealite marse lanplwa e lekonomi

ozordi. Travay pou reviz sa Lalwa i ase avanse e sa Prozedlwa pou vin devan Lasanble Nasyonal boner lannen prosenn.

Mr Speaker, plan nasyonal pour resours imen i espekte ganny finalize ver lafen 2024. Sa plan pou met devan bann *skills* e lanplwa, ki an demann ozordi e pour sa prosen 5 an. I pou diriz bann lenstitisyon edikasyonnel e lorganizasyon lo domenn ki an demann lo marse lanplwa, pou asire ki nou pep i ganny formen dapre bezwen pei. 14

12. Sekter Ledikasyon:

Mr Speaker, lenvestisman dan sekter ledikasyon i reste en priyorite pour nou Gouvernman. Sa sekter i anfet fondasyon e primordyal dan sa transformasyon ki nou pei pe pas atraver. Nou bann zanfan i devret konpran ki nou pe fer en kantite lenvestisman finansyel dan zot ledikasyon, me a lafen dizour, i depan lo zot pou sezi sa loportinite e pran zot ledikasyon o serye, pour zot kapab ganny en bon lavenir demen. Zot bezwen realize ki sa 'bout papye' ki zot gannyen enn fwa zot termin zot letid ki determinen ki kalite travay ek saler zot pou gannyen.

Mr Speaker, nou pou bezwen al dan en reform transformativ dan nou sistenm ledikasyon. Nou sistenm ledikasyon pa pou kapab reste kot i reflekte bann realite 20 an, 30 an pase. Lemonn in evolye e Sesel i bezwen met li pare pou sa nouvo lemond ki nou pe viv ladan.

Nou annan en responsabilite pou nou prepar nou zanfan pour sa lasosyete ozordi e osi pou sa nouvo lemond travay. Nou bezwen sorti dan en sistenm ki santre lo zis formasyon akademik me enn ki osi enkli devlopman lezot '*skills*' ki zot pou bezwen dan zot lavi. Andotmo nou bezwen ede fer zot vin pli rezilyan e osi annan plis bagaz pou bann nouvo louvraz ki nou lekonomi pe e pou prodwi.

Sa i anmenn mwan lo en size ki monn koz bokou lo la. Sa se asire ki nou lekonomi i prodwi bann louvraz ki pey en saler pli O. Sa i deza pe arive, nou war ki nou ganny bokou problem pou ranpli sa bann pozisyon. Ki mannyer nou fer pour nou pep ganny en louvraz ki pey en pli O saler e sa i ava ed zot viv en lavi pli konfortab? Annou nou tou travay ansanm pou kontinyen ed nou lekonomi prodwir bann louvraz ek

loportinite ki anmenn plis rannman.

Annou devlop en sistenm ledikasyon ki donn nou bann zanfan loportinite pou ganny konpetans pou prepar zot pou kapab pran sa bann pozisyon.

Pour lannen 2025, sa sekter pe ganny en Bidze SR 1.4 bilyon. Sa sonm i reprezant 4.3% nou *GDP*. Nou vwar en alokasyon SR 614.4 milyon pe ganny propoze dan Bidze pour saler e reminerasyon, ki reprezant 44% depans total anba sa sekter. Pli gro sonm pour sa sekter, i anba 'byen ek servis' pour en sonm SR667.5 milyon, ki reprezant 47% depans total anba sa sekter, e SR 126.9 milyon pe al anver depans dan bann proze kapital.

Mr Speaker, pou asire ki nou zanfan i ganny en pli bon konmansman depi ler zot ankor pli zenn, an 2025 Gouvernman in met en sonm SR 27.96 milyon pour '*Child Care Scheme*'. Lenstiti pour Devlopman Pti Lanfans pe osi enplimant en nouvo sistenm nimerik pour sa lasistans finansyel, anliny avek azanda lekonomi nimerik. Ziska Oktob 2024, i annan 2,483 zanfan ki'n anrezistre lo sa sistenm ki pe benefisye avek sa lasistans.

En sonm SR 1.6 milyon in osi Bidzete an 2025, pour 'Fon

Pti Lanfans'. Se bann '*child care managers*' e '*childminders*' ki ganny asiste anba sa fon. Zot kapab fer laplikasyon pou resevwar lekipman e resours edikasyonnel, pour ki zot an konformite avek standar ki *IECD* ek son bann partener in etabli.

Mr Speaker, parey zot konnen, Gouvernman i investir dan sekter ledikasyon lo tou nivo lekol. Depi sa ki dan 'child care' ziska lo nivo liniversite. An 2025, en sonm SR 198.4milyon pe ganny Bidzete dan fon letid. Sa i kouver pour endividi ki deza dan en lanplwa e osi etidyan ki'n termin zot letid dan bann sant profesyonnel.

Apard, ki program labours Gouvernman, en alokasyon SR 8 milyon pe Bidzete pour lannen 2025 pour skim '*loan edikasyonnel*' avek labank komersyal. Sa skim i permet etidyan annan sa opsyon pran en *loan* pou investir dan zot prop ledikasyon. Depi ki sa skim ti lanse an 2023 nou annan anviron 25 etidyan ki'n deza benefisye, pour en lavalier *loan* SR 11.6 milyon.

I byen osi note ki depi sa lannen, Gouvernman pe ofer 5 'fully funded scholarships' tou le lannen dan domenn Lenformasyon, Kominikasyon

ek Teknolozi (*ICT*). Sa i touzour anliny avek nou stratezi transformasyon nimerik. Dan sa domenn i annan en gran demann me nou napa ase Seselwa kalifye.

Mr Speaker, Gouvernman i reste angaze pou anmenn teknolozi dan ledikasyon. Sa pou ede fasilite lavi bann ansennyan e osi i pou pli adaptif pou bezwen bann zenn ki ozordi pe viv dan en lemonn kot zot pe ganny ekspeze avek diferan form teknolozi.

En alokasyon SR29.2 milyon in Bidzete pou asire ki nou kree sa lanvironnman ki pou fasilite laprantisaz e fer sir ki nou bann zenn i epanouir. I pour sa rezon ki depi sa lannen, zanfandan depi P5 an montan pe ganny akse avek skim '*laptop*'. An 2025 provizyon Bidzeter pour sa skim i SR 6 milyon. Anba sa skim Gouvernman i fer en kontribisyon SR 3,000 anver pri *laptop* pour tou zanfandan.

Gouvernman dan son plan transformasyon nimerik in angaz li pou ekip lekole avek resous apropriye pou fasilite son lenplimantasyon. An 2024, Gouvernman in prokir 330 '*desktop*' pour lasal konpiter e 314 '*laptop*' pour ansennyan lo nivo administratif e bann ki ansarzan bann program.

An 2025 Gouvernman pou prokir '*laptop*' pour tou lezot ansennyan kalifye. Apartir 2026, sa program pou enkli asistan ansennyan. Mr Speaker, foudre note ki avan lantrodikasyon sa program sa lannen, ansennyan ti bezwen pran en '*loan*' avek Minister Ledikasyon pou aste zot *laptop*. Depi sa lannen, zot pe ganny donneren zot zouti travay.

(APPLAUSE)

MINISTER NAADIR HASSAN

Mr Speaker, Gouvernman in ekout bann defi ki bann paran ki annan bann zanfandan ki ganny afekte avek Otizm i fer fas avek. I kler ki napa ase ki'n ganny fer pou asiste sa bann paran e ed sa bann zanfandan, sirtou pou asire ki nou annan en sistenm ledikasyon pli enklisiv. Pandan sa lannen Gouvernman in antre dan en konversasyon avek Lasosyasyon Otizm pou konpran pli byen bann defi e kwa ki nou kapab fer koman en Gouvernman pou ede.

La mon ti a kontan eksprim mon apresyasyon avek Lasosyasyon Otizm ki vreman pro aktiv e determinen dan zot lalit pou ganny plis lasistans pour zot koz. Alor avek sa bi antet, apartir Zanvye 2025,

Gouvernman pe met resours apropriye pou enkonpor sant 'Otizm' anba lankadremman Minister ledikasyon.

(APPLAUSE)

MINISTER NAADIR HASSAN

En sonm SR 4.1 milyon in ganny mete dan Bidze pou kouver kou loperasyon sa sant. Sa i enkli rekritman profesyonnel ki travay avek sa bann zanfan, e osi pou donn formasyon bann ansennyen ek paran pou pli byen pran swen avek sa bann zanfan. Mon donn mon lasirans avek bann paran ki sa i selman en konmansman, dan zefor Gouvernman pou kontinyelman ed bann zanfan otizm.

Mon fer en lapel avek bann lezot lasosyasyon ki pe fer bann louvraz nob pou apros Gouvernman e konmans en konversasyon e nou ava regarde ki mannyer nou travay pli pros ek kanmarad pou ed nou pep.

Mr Speaker, anba proze kapital dan sekter ledikasyon, en sonm SR 126.9 milyon pe ganny propoze dan Bidze 2025. Bann proze renovasyon en pe pli mazer i konm swivan:

□ Renovasyon lo lenfrastruktir 'Headquarters' pour Minister Ledikasyon -SR 9.7 milyon

□ Renovasyon lekol Primer La Rosière-SR 2 milyon

□ Renovasyon lekol Bel Eau -SR 2 milyon

□ Renovasyon lekol Bel Ombre-SR 2 milyon

□ Renovasyon lekol Glacis-SR 2.5 milyon

□ Renovasyon lekol Primer Perseverance-SR 3 milyon

□ Renovasyon lekol Belonie -SR 2 milyon

□ Renovasyon lekol La Retraite SR -1.5 milyon

□ Renovasyon lekol Segonder Anse Boileau -SR 4 milyon

□ Renovasyon lekol Segonder Mont Fleuri -SR 1.5 milyon

□ Renovasyon lekol Segonder Anse Royale -SR 2.5 milyon

□ Renovasyon lekol Segonder Praslin -SR3 milyon

□ Renovasyon *Youth Hostel* -SR 2 milyon

□ Renovasyon Lenstiti Teknolozi -SR 3 milyon

□ Renovasyon mazer Lenstiti Ansennyen -SR 4.5 milyon

An term bann nouvo proze Konstriksyon sa i konm swivan;

□ Konstriksyon nouvo blok lekol Primer La Rosière -SR 15 milyon

□ Konstriksyon nouvo laplenn lekol Glacis -SR 3 milyon

□ Konstriksyon lekol La Digue -SR 47.6 milyon

- Konstriksyon miray o tour lenstiti *SIDOL* -SR 3 milyon
- Konstriksyon miray o tour lekòl *A Level* -SR 2.5 milyon
- Demolisyon e konstriksyon nouvo blok laklas lekòl Segonder Praslin -SR 4.5 milyon
- Konstriksyon '*Mini Sewage Treatment Plant (STP)*' pou lekòl Primer e segonder Anse Boileau -SR 4.2 milyon
- Konstriksyon en laklas pou zanfan avek bezwen spesyal lekòl Beau Vallon-SR 600 mil

Mr Speaker, parey nou vwar Gouvernman pe kontinyen investir dan sekter ledikasyon nou bann zanfan. Me parey monn dir pli boner, i pa depan lo zis nou, me la kominote, sirtou paran ek zanfan pou zot sezi bann loportinite edikasyonnel ki a zot dispozisyon.

13. Sekter Lasante :

Mr Speaker, byennet nou pep an sa ki konsern lasante i reste enn bann priyorite pli enportan pou Gouvernman. Pour lannen 2025, en sonm SR 1.52 bilyon pou sekter Lasante in ganny propoze. Sa i en ogmantasyon 9% konpare ek 2024 e 15% konpare avek 2020 avan sa ladministrasyon ti vin o pouvwar. Depans anba byen ek servis i reprezant 45% Bidze

total sekter Lasante. Sa i en reprezant SR 679.9 milyon Bann depans pou byen ek servis i enkli:

- Depans lo provizyon medikal - SR 75.3 milyon
- Depans lo provizyon vaksen - SR 10.2 milyon
- Depans lo provizyon laboratwar - SR 36.6 milyon
- Depans lo tretman dyaliz - SR 76.8 milyon
- Depans lo lezot provizyon medikal ek laboratwar - SR 70.4 milyon
- Tretman spesyalize aletranze - SR 50 milyon
- Formasyon profesyonnel lasante - SR 9.3 milyon

I osi enportan note ki en sonm SR 696.3 milyon ki reprezant 45.7% Bidze total lasante i pou peyman saler bann profesyonnel lasante. Sa sonm i osi reprezant 18.7 % total Bidze saler sekter piblik.

Mr Speaker, lenvestisman dan nou fasilite lasante i reste en priyorite pou Gouvernman. Dan sa Bidze 2025, en alokasyon SR 146.6 milyon pe ganny prozekte dan sekter lasante, an term proze kapital. Sa i reprezant 7.9% proze kapital Gouvernman.

I enportan pou note ki bokou nou bann fasilite lasante in avarye e sa i fer li enportan pou kontinyen nou program

renovasyon lo sa bann fasilite. Pandan sa bann lannen ki'n pase, nou ladministrasyon in fer lenvestisman pour en sonm SR 136 milyon lo sa bann fasilite swivan ;

Renovasyon lo ward Zonm ek Madanm

Renovasyon kontinyel lo Lopital Sesel

Travay pou kouvertir laboratwar pou vin *ICU*

Fasilite stokaz *LPG* kot lopital Mahe ek Praslin

Renovasyon lo sant sterilizasyon *CSSD*

Travay lo complex North East Point

Konstriksyon Lopital *St Mary's La Digue*

Lenstalasyon '*lifts*' Lopital Sesel e

Akizisyon bann '*stand by generators*'

Pour 2025, travay i kontinyen e nou pe propoz en Bidze SR 34.5 milyon pour renovasyon bann lezot fasilite lasante. Sa i konm swivan ;

Travay renovasyon lo Lopital Sesel - SR 15 milyon

Renovasyon Sant Lasante Anse Boileau - SR 2.6 milyon

Prokirman e enstalasyon 'lift' 'dan lopital Anse Royale - SR 2 milyon

Kontinyasyon proze pou azout nouvo fasilite dan batiman *NIHSS* - SR 2.5 milyon

Provizyon pou renovasyon lopital - SR 4 milyon e renovasyon lo lezot sant lasante - SR 3 milyon

Renovasyon bann lezot lenfrastruktir lasante - SR 5.4 milyon

Anplis ki renovasyon, envestisman dan bann nouvo fasilite lasante i osi enportan. Travay lo klinik Baie Lazare in fini konmanse e sa pou kout SR 8.7 milyon. E de lezot proze prensipal pour lannen 2025 i ;

Konstriksyon en Stor Medikal - SR 16.98 milyon

Konstriksyon en nouvo Sant Lasante 'Ile Soleil', Anse Aux Pins- SR 9 milyon

Pli gro proze ki nou ekspekte konmanse an 2025 i en nouvo lopital. Sa lannen nou lopital Sesel i ganny li 100 an. I kler ki sa fasilite nepli soutenab ozordi e pour le fitir. I enportan pour nou investir dan en nouvo lopital modern, ki pou zwenn laspirasyon e bezwen nou pep pour sa prosen 100 an. Sa lenvestisman i pa zis konstriksyon en nouvo batiman me investir dan en fitir pour tou Seselwa ganny akse avek servis medikal pli spesyalize. Sa lenvestisman i reprezant en vizyon lonterm ki Gouvernman i annan pour en sistenm lasante pli soutenab, rezilyan e

kapab donn en servis pli o nivo pour nou popilasyon.

Gouvernman pe finaliz en evalyasyon konpreansif lo proze nouvo lopital ki pran an kont tou lezot fasilite lasante ki egziste ozordi. Dan Bidze pour sa prosen 3 an en sonm apepre SR661.2 milyon in ganny propoze. En alokasyon SR 87 milyon in ganny mete dan Bidze 2025 pou demar sa proze.

Mr Speaker, mwan osi anvi remerisi sa komite ki pe travay vreman dir pou rod finansman pour konstriksiyon nouvo lopital, dan sa menm lespri kot bokou dimoun ti kontribye pour konstriksiyon lopital Sesel, en santener pase. Nou tou annou mazine ki en zour nou, e nou fitir zenerasyon pou servi sa fasilite. Dan sa lespri, mon fer en lapel avek tou Seselwa, pou kontinyen met zefor ansanm pou fer sa proze vin en realite.

En lot proze ki nou pe al war son benefis se sa lenvestisman dan en Sistenm Lenformasyon Entegre pour lasante, ki pandan sa dernyen 5 an in kout Bidze SR 53.1 milyon. Sa nouvo sistenm lenformasyon pe ganny enplimante kot Lopital Sesel e tou lezot fasilite lasante ki ava ede ki okenn dokter ousw ners, ki pe donn en servis en pasyan a okenn moman, a

kapab ganny akse avek lenformasyon medikal pli vit lo sa pasyan.

Alors bann profesyonnel dan sekter lasante ava kapab donn en dyagnostik e en tretman pli kordinen lo sa pasyan avek bi pou amelyor kalite swen lasante e lefikasite dan servis lasante.

Sa sistenm pou osi :

☐☐Enplimant sistenm apwentman dan klinik ki a ede pou minimiz letan ki pasyan i espere pou ganny servis

☐☐Fer li pli fasil pou kolekte lenformasyon, ki pou ede pou annan polisi pli targete dan domenn lasante

☐☐Fasilit ladministrasyon bann ward pou fer sir ki tou lekিপman neserer i ganny mete depandan lo bezwen pasyan

14. Devlopman Sport e Lazenes: Mr Speaker, en nasyon ki aktiv i enn ki prodiktiv e an bonn sante, ki ede pou redwir presyon lo nou sistenm lasante. I pour sa rezon ki Gouvernman pe investir bokou dan devlopman sportiv. Avek en lemonn ki anmenn bokou defi pour nou popilasyon dan laspe lasante mantal e fizik, spor i reste sa eleman kritik pou fer nou sirmont sa bann lobstak. Lenvestisman dan lenfrastruktir sportif i ava ed nou zenn

epanouir, pa zis lokalman me osi lo nivo enternasyonal.

An 2022, mon ti vizit bann fasilite sportiv ansanm avek minis responsab pour spor, kot mon ti deklare ki nou bann lenfrastruktir sportiv in ganny tro neglize e pann ganny byen mentenir. Pandan lannen 2024, Gouvernman in investir SR 42.8 milyon lo reparasyon diferan lenfrastruktir sportif e osi SR19.4 milyon an 2023. Bann pli gran lenvestisman i konm swivan:

- Travay renovasyon Stad Linite ki enkli nouvo sirfas pour atletik- SR 5.5 milyon. Travay osi pe kontinyen pou renovasyon lo ‘*changing room*’ pour atlet avek refri.

- Kontinyasyon travay renovasyon ‘*Palais des Sports*’- SR 7 milyon

- Renovasyon lo 5 kort tennis in konplete ki enkli en nouvo sistenm konpreansif pour lalimyer. Sa i ava ed bann atlet annan plis vizibilite letan pe fer aktivite apre ler

- Travay osi pou komanse sa lannen lo renovasyon twatir ‘*ex-School Meal Center*’

- Renovasyon pou osi konmanse lo fasilite ‘*dojo*’

- Gouvernman pe osi fer prokirman lekipman e sirfas pour de kort dan distrik.

- En ‘*kicking gym*’ in ganny konstrir Roche Caiman *Sports Complex* ki siport bann atlet ‘*martial arts*’.

Sa travay renovasyon entansiv pou kontinyen pandan lannen 2025 avek bi asire ki nou fasilite *sport* i a en nivo, pou ankouraz plis aktivite sportif enternasyonal fer isi Sesel. En prozeksyon SR 88.1 milyon pe ganny prozekte e bann pli gran alokasyon i konm swivan;

- Renovasyon ‘*Sports Complex*’ Anse Royale - SR 5.6 milyon

- Bann lezot renovasyon Stad Linite ki enkli en nouvo tinel pour atlet e osi renovasyon ‘*south stands*’ ki pou donn en nouvo konfor spektater - SR 7.7 milyon

- Konstriksyon en ‘*Multi-Purpose Indoor Court*’ Anse Royale- SR 42.4 milyon. Sa proze pe al lo prosedir tender ver lafen Novanm 2024

- Renovasyon ‘*Sport Complex*’ La Digue - SR 1.6 milyon

- Renovasyon fasilite lenfrastruktir *sports* Mont Fleuri ki enkli sistenm drenaz- SR 1.5 milyon

- Renovasyon Stad Amitié Praslin- SR 2 milyon

- Bann lezot renovasyon ‘*Palais des Sports*’- SR 1.9 milyon

□ Travay renovasyon kot basen naze ki enkli ‘*changing room*’ pour atlet - SR 1 milyon.

Sa i enkli SR 20 milyon pe ganny Bidzete an 2025 pou siport lezot travay renovasyon lo fasilite sportif. Sa i enkli;

□ Renovasyon pour anferm fasilite kort ‘*multipurpose*’ Mont Buxton e Port Glaud.

□ Renovasyon ‘*changing room*’ lo fasilite sport Point Larue e Baie Lazare.

□ Konstriksyon ‘*outdoor gym*’ dan distrik Grand Anse Mahe, Anse Boileau, La Digue avek Takamaka, pour en total SR 3.4 milyon. Mon swete zabitan sa bann distrik a pran sa loportinite, pour zot angaz zot plis dan aktivite fizik e sa i ava en benefis lonterm pour nou sosyete.

Mr Speaker, an 2025, Sesel pou akeyir de aktivite sportiv enternasyonal. Premye ki pou fer an Me, i ‘*FIFA Beach Soccer World Cup*’ e dezyenm an Zilyet – *CJSOI*. Gouvernman pe met en sonm SR 40.6 milyon dan Bidze anba byen ek servis pour lorganizasyon e partisipasyon dan ‘*CJSOI*’ e SR 3 milyon dan ‘*FIFA Beach Soccer World Cup*’.

En sonm SR 3.2 milyon in Bidzete pour lasistans pour bann federasyon. En sonm SR 745,000 in osi ganny mete pour

lasistans bann lekip letan zot vwayaze lo bann zil pou fer konpetisyon. En sonm SR 1.58 milyon pe ganny bidzete pour devlopman zenn dan *sports* e SR 723 mil pou idantifye talan. En sonm SR 1.71 milyon osi in ganny bidzete pour alawenns pour lantrener.

Nou pe osi met en sonm SR 3.1 milyon dan Bidze 2025 pour devlopman spor lo en baz profesyonnel. An 2025, i annan en sonm SR 5.75 milyon pour preparasyon bann atlet pour zwe Olenpik, Zwe Lafrik, Zwe Losean Endyen, e Zwe ‘*Commonwealth*’ ki pou fer dan bann lannen ki pe vini.

Gouvernman in osi finaliz diskisyon avek lasosyasyon ‘*motor racing*’ pour sa morso semen ‘Ile Du Port’ ki anba konstriksyon pou ganny servi pou organiz zot aktivite pour zot menm. Sa lasosyasyon pou bezwen investir dan mezir sekirite avan ki Gouvernman i donn zot laprouvasyon final.

Gouvernman pou kontinyen ‘*empower*’ bann zenn atraver diferan aktivite. Konsey Nasyonal pour Zenn in ganny alokasyon en Bidze total SR 26.6 milyon pou elarzi aktivite e siport bann linisyativ dirize par bann zenn lo nivo distrik ek rezyon. Priyorite pou lo ogmant lakantite klib zenn ki angaze

dan bann domenn en pe diferan parey ‘coding’, devlopman aplikasyon, ek inovasyon dan domenn nimerik, pour devlop bann kapasite enportan pour transformasyon nou lekonomi.

Anplis, i pou annan envestisman dan nouvo program parey ‘boot camps’ ek formasyon lantreprenarya, vize lo bann zenn ki konn teknolozi e pour ankouraz inovasyon lo baz ‘grassroots’. Promosyon lar, ek linisyativ servis kominoter bann Klib Lentere, pou asire ki annan en gran varyete loportinite pour tou zenn dan pei. Gouvernman pe osi kolabor plis avek bann partner rezyonal, pou ofer loportinite pou ekspoz nou bann zenn Seselwa lo marse Lafrik, Lerop ek Lanmerik. Sa pou ouver laport pou eksperyans enternasyonal ek loportinite, ki pou anrisir zot devlopman personnel ek profesyonnel.

15. Bann Proze e Program dan Lakominote:

Mr Speaker, parey zot in konstate, Gouvernman pe fer en kantite lenvestisman dan bann fasilite sportif lo nivo distrik, avek bi ankouraz nou popilasyon pou vin pli aktiv e partisip plis dan zot kominote. Sa lenvestisman i form parti en pli gran stratezi ki Gouvernman

pe fer dan distrik, pou benefisye plis nou zabitan. Amelyor bann fasilite e aktivite ki annan pou fer dan kominote i form par en plan Gouvernman pou osi lager osi kont bann fleo parey labi sibstans e krim.

An 2025, Minister responsab pou Zafer Kominoter e Gouvernman Lokal, an partenarya avek son bann partner, pou devlop en polisi nasyonal lo byennet e epanouisman kominoter, avek bi:

- Asire ki tou servis Gouvernman i ganny kordinen e tous tou kous nou popilasyon;
- Asire ki devlopman lenfrastruktir i bouz ansanm avek devlopman e epanouisman imen e
- Asire ki fleo sosyal i redwir e ki bann bon valer kominoter, enkli bann valer moral e spirityel i ganny ranforsi.

Mr Speaker, sa transformasyon ki Sesel pe pas atraver depi 2020, i pa zis pe target nou lekonomi, me osi nou kominote. In annan bokou lanfaz ki’n mete lo program kominoter, pou ede anmenn dimoun ansanm dan diferan kalite program apre ler - ki swa dan lar, ledikasyon, kiltir, spirityel e lezot. Bann kan vakans O nivo in ganny organize dan diferan distrik. Sa

se pou fer sir ki bann zanfan i annan en keksoz pou fer dan vakans.

Gouvernman pe travay lo enstalasyon sistenm CCTV kamera dan serten distrik pou amelyor sistenm sekirite dan biro ek fasilite distrik.

Mr Speaker, depi lannen 2021 ziska lannen 2023, Gouvernman in konplet 356 proze dan distrik pour a lavalè SR 58.1 milyon. An 2024, nou ekspekte pou konplet 184 proze pour en sonm SR 35 milyon. Pour lannen 2025, Gouvernman pe fer en alokasyon SR 26 milyon pour bann pti proze dan distrik. En sonm SR 15 milyon in osi ganny mete pour bann pti semen segonder dan distrik, ki i ava ed deplasman nou zabitan. Sa sonm i en ogmantasyon konpare avek en alokasyon SR 10 milyon an 2024.

Gouvernman i annan li en total 15 sant *Day Care*, e 10 parmi in pas anba renovasyon mazer pandan lannen 2023 a 2024. An 2021, 5 nouvo *day care* ti ganny konstrir e ti ganny remet avek operater atraver prosedir '*tender*'. Sa i Grand Anse Praslin, Baie St Anne Praslin, Takamaka, Anse Aux Pins, e Glacis. *Day Care* Mont Fleuri i dan staz reparasyon e

nouvo *Day Care* Les Mamelles i dan prosedir '*tender*'.

(APPLAUSE)

MINISTER NAADIR HASSAN

Sa lannen, Gouvernman i ekspekte depans SR 2.8 milyon e nou pou ogmant sa sonm pou vin SR 4.4 milyon an 2025 pour konstriksyon e renovasyon '*day care*'.

Laplipar bann biro oubyen sant kominoter i date depi bann lannen katrevendis e zot pa dan en leta konvenab. Depi 2021 ziska 2024, travay renovasyon in ganny fer lo 14 parmi sa 26 lofis, sa i enkli Biro Ladministrasyon Distrik e sant sosyal Grand Anse e Baie Ste Anne Praslin. Travay reparasyon mazer in ganny fer lo 12 Sant kominoter.

En Bidze total SR 15.8 milyon pe ganny Bidzete an 2025 pou konplet Biro Ladministrasyon Distrik Bel Ombre; Sant Kominoter ek Biro Ladministrasyon Distrik Cascade, e Perseverance. En alokasyon SR 1.5 milyon pe ganny bidzete pour renovasyon twatir sant kominoter Anse Royale e SR 1 milyon pour renovasyon sant kominoter Beau Vallon.

Mr Speaker, volontarya i en aksyon ki bezwen ganny plis

ankouraze dan lakominote ki ava enkilke bann bon valer dan nou sosyete. I annan bokou zabitan ki pe donn sa bann servis volonter, espesyalman dan bann letan dirzans. Enn parmi sa bann groupman i Brigard Dirzans ki tonm anba responsabilite Administrasyon Distrik. Nou salye zefor sa bann endividi e pour sa rezon ki Gouvernman pe ogmant sa 'incentive' sorti SR 1,500 par an, pou vin SR 3,000. Sa pou pran lefe an 2025.

(APPLAUSE)

16. Sektor Sosyal :

MINISTER NAADIR HASSAN

Mr Speaker, menm avek tou sa lenvestisman pou ed nou popilasyon epanouir e debourye, malerezman i annan ki feb e war zot tonm dan diferan kalite fleo sosyal. Nou tou nou ti a swete ki en zour, nou viv dan en Sesel kot tou fleo sosyal in ganny mete anba kontrol oubyen konpletman eliminen. Me sa i reste touzour en aspirasyon. Ozordi, nou pe bezwen kontinyen donn sipor nou bann frer ek ser ki'n tonbe, avek lespwar ki en zour zot a redebout e vin pli rezilyan pour

zot kontribye ver zot fanmir, lakour ek pei.

Mr Speaker, avek sipor Labank Mondyal, en analiz e resers detaye e aprofondi in ganny fer pou regard bann faktor risk dan nou bann zenn. Apre plizyer resers, 'interview', miting e konsiltasyon, Labank Mondyal in prezant rezilta sa rapor.

Mr Speaker, rezilta sa resers i enn ki konsernan e si konman en nasyon nou pa pran en pli gran responsabilite pou edik, ekip, ankadre e sipor nou bann zenn nou pa pou bouz devan.

Mr Speaker, Gouvernman avek tou bann partner kle pou bezwen travay ansanm pou nou adres bann defi devan nou, lentervansyon pou bezwen vin a trwa nivo;

Premyerman; ki mannyer nou entegre servis sosyal dan lekol pli byen,

Dezyenmman; ki mannyer la kominote pou ede e anmenm en soutyen atraver bann aktivite kiltirel, sportif, spirityel e menm edikasyonnel e

Trwazyenmman; ki mannyer nou pou ekip nou zenn pour zot war lenportans annan en karyer e ki kalite loportinite nou pou met a zot laporte ase boner pou fasilite sa tranzisyon.

Mr Speaker, an atandan, nou pe bezwen fer fas avek larealite ozordi, kot i annan nou zenn ki'n tonbe. Gouvernman i reste angaze dan sa lalit kont sa bann fleo ki pe afekte nou sosyete. Ver lafen sa lafen, nou ekspekte war nouvo proze "Youth Hope Centre" konmanse. Sa proze i ekspekte kout en total SR 41.7 milyon. En alokasyon SR 30 milyon in ganny fer dan Bidze 2025.

Mr Speaker, sa sant i ava donn lespwar nou bann zenn. I pour en landrwa rezidansyel pour zanf an ki bezwen servis spesyalize an term zot konportman e ledikasyon alternativ. Sa proze pou annan 2 konponan, premye i pou en konponan Rezidansyel e dezyenm en konponan edikasyonnel. Sa pou asire ki ler zenn i antre dan sa program i tous zot devlopman entegral ki pou ede reform zot karakter pou re-antre dan sosyete. Proze i ekspekte terminen ver katriyenm kar lannen prosenn, e en sonm SR 3.7 milyon in bidzete pou kouver son kou loperasyon lannen prosenn. Mr Speaker, sa sant pou kout Gouvernman SR 9.2 milyon par an pou zer li.

Mr Speaker, letan ki Gouvernman pe depans plizyer milyon rounpi pou konbat kont

trafik drog, i malere ki en group zot pe anrisir zot pos avek plizyer milyon rounpi sal ki tase avek soufrans tou viktim drog ansanm ek zot fanmir.

Depi ki nou'n vin o pouvwar, lalit kont drog in reste enn nou priyorite. Depi Zanbye 2021 ziska Out 2024, en total 1.2 milyon granm drog in ganny sezi. Sa i enkli eroin, kokainn, kanabis, 'ecstasy' e pandan sa de dernyen lannen drog parey "crystal meth e methamphetamine". Msye Spiker sa bann drog an total i annan en valer SR 439 milyon lo marse. Zis mazine nou bann pov frer e ser ti pou depans SR 439 milyon rounpi lo sibstans ki detri zot lavi, lavi zot fanmir e la kominote an zeneral.

Mr Speaker, sa bann lasezisman in vin an rezilta travay sanses ki departman lapolis pe fer. Pandan sa menm peryod, zot in fer en total 2,118 larestasyon, dan ki 508 ka in ganny prosekite, e ziska Out 2024 - 221 ka in ganny anprizonnen.

Travay prevansyon e rehabilitasyon i bezwen mars kot a kot. Pou ede siport rehabilitasyon bann viktim avek adiksyon sa bann sipor neser pou met anplas;

□ Renovasyon sant Anse Boudin – Praslin, pour bann

pasyan avek adiksyon- SR 3 milyon.

□ Finansman pou siport Dyosez Katolik avek en nouvo program reabilitasyon anba parasol '*La ferme de L'espoir*' pour ed bann zenn Seselwa ki'n ganny afekte avek adiksyon lalkol ek drog.

Mr Speaker, sa proze pou baze dan distrik Port Glaud lo en propriyete ki pour Dyosez Katolik. Gouvernman an 2025 pou kontribye SR 4.1 milyon pou prensipalman kouver renovasyon lo de batiman ki pou servi konman sa sant. Gouvernman pe osi kouver kouloperasyon pour 3 mwan an 2025, e an 2026 Gouvernman pou donn en sipor 390 mil rousi ki pou kouver kouloperasyon sa sant pour 9 mwan.

□ Gouvernman ansanm avek "CARE", pou konmans en program spesyal lo en baz pilot dan 6 lekol primer, enn dan sak rezyon apartir Zanvye 2025. Sa program pou target tou zanfandan P1 e i pou ale pour en peryod 3 an. Gouvernman pou siport Care avek en Bidze SR 1.8 milyon pour sa proze. Bi Gouvernman se pou evantyelman enplimant sa program dan tou lekol. Alors nou pe fer en lapel avek sekter prive pou vin devan e donn zot sipor. Mr Speaker,

mon osi enplor bann paran pou ankouraz zot zanfandan pou partisip aktivman dan sa program.

Mr Speaker, apartir Zanvye 2025, tou lekol leta dan Sesel pou bezwen zwe en pli gran rol anver aktivite apre ler lekol. Minister Ledikasyon ansanm avek bann lekole lezot partener tel ki SNYC, Lenstiti Kiltir, Gouvernman Lokal e Sosyete Sivil pou vin pli aktiv e servi lanvironnman lekole pou fer zot bann aktivite.

Lanvironnman lekole i enn parmi bann landrwa pli sekirize pour nou zanfandan, dan plas zanfandan apre lekole al kot lakour e paran i ankor pe travay ki ogmant zot risk al anver bann aktivite anti sosyal. Bann sipor swivan pou ganny met an plas apartir Zanvye 2025;

□ SR 1.9 milyon anver bann klib lentere, ki tonmanba SNYC, pou devlopman bann proze e program.

□ SR 1.9 milyon pou siport peyman pou bann animater dan distrik. Program pou tous tou group sosyete ki pou enkli bann zenn. Animater pou ganny peye SR 3,000 par mwan. Sa program i administre par Minister Gouvernman Lokal.

□ SR 1.7 milyon sipor adisyonnell anba Lenstiti Kiltir

pou sipor bann aktivite kiltirel e tradisyonnèl dan lekòl e dan kominote.

Mr Speaker, konstriksyon en “*crisis centre*” pou konmanse an 2025, en alokasyon SR 4.7 milyon in ganny mete dan Bidze. Sa sant pou ekipe avek en “*Call Center*” ki pou fonksyonn 24 lo 24 avek en lekip ki pou travay avek bann ka ki ganny rapòte apre 4 er ler tou biro in fermen. Sa lekip pou osi donn servis ‘*helpline*’ e refer bann ka avek travayer sosyal pour lentervansyon.

Mr Speaker, sa i montre langazman Gouvernman pou reponn bezwen son pep a nenport keler e ki moman.

Mr Speaker, SR 4 milyon in ganny mete dan Bidze pou kouver renovasyon en propriyete ki pou ofer servis pour viktim vyolans domestik.

Mr Speaker, pou nou bouz pli devan konman en nasyon, i pou depan lo en zefor kolektiv e kot sak endividi i pran son responsabilite. Gouvernman i met an plas diferan program e servis, me i reste responsabilite sak endividi pou servi tou loportinite ki a zot dispozisyon, pou amelyor zot lavi personnel, zot fanmiy, zot lakominote e an retour Sesel ki prospere konman en nasyon.

17. Alokasyon pour bann program sosyal:

Dan Bidze 2025, Gouvernman pou kontinyen onor son langazman pou finans bann program sosyal, ki target dimoun pli vilnerab dan nou sosyete. Sa bann program i asire ki sa bann group e zot fanmir pa tonm dan lapovrete, e kot Gouvernman i aport en soutyen pou ed zot fer de bout zwenn.

Bidze pour lannen 2025 pour sa bann program mazer i konm swivan :

Benefis administre par Lazans Proteksyon Sosyal :

☐ SR 61.8 milyon pour ‘*Social Safety Net*’

☐ SR 23.4 milyon pour benefis bann zanfan ki’n perdi swa en paran oubyen tou lede paran,

☐ SR 7.7 milyon pour benefis ‘*foster parents*’

☐ SR 3.1 milyon pour benefis ‘*multiple births*’

☐ SR 6.6 milyon pour ‘*sickness benefits*’, e

☐ SR 1.3 milyon pour benefis maternite ek paternite

Nou ava rapel ki sa bann benefis ti ogmante an Zanvyè 2024 e Gouvernman ti azout enn nouvo, sa ti ‘*Multiple Births*’. Parmi serten pa tin ganny revize depi 2016.

Benefis administre par Minister ledikasyon ;

- SR 23.6 milyon pou kouver fre bis etidyan
- SR 3 milyon anver '*Dedicated Fund*'
- En sonm SR 35 milyon, pou kouver program *'breakfast ek dezennen dan lekòl* Benefis ki al anver bann program lakaz ;
- SR 10 milyon pour skim Reparasyon Lakour Vilnerab, sa i administre par Departman Lakaz;
- SR 10 milyon, *special housing*
- SR 5 milyon pour skim '*Home Improvement/Re-roofing*' pour pansyoner atraver *HFC*;

□ SR 24 milyon pour skim sibvansyon '*loan*' lakaz, ki administre par *HFC*.

Serten lezot benefis i konm swivan;

En alokasyon SR 36 milyon in ganny fer koman konsesyon vwayaz. Mr Speaker, sa i kouver tiket bis pour dimoun aze, dimoun avek dezabilite e pli gro sonm i al anver dimoun ki pran de bis pou al travay. Gouvènmman i sibvansyon dezyenm parti sa vwayaz, sa ki nou dir '*workers special*'.

Mr Speaker, alawenns bann etidyan pos-segonder, ti dernyen fwa ganny revize an 2014. Gouvènmman sa lannen ti ogmant alawenns bann etidyan

lo zil pros par SR pou kouver depans adisyonnèl ki zot bezwen fer pour nobou kontinyen zot letid pos-segonder lo Mahe. Ver Avril 2025, alawenns etidyan dan bann pos - segonder pou ogmante konm swivan - ki garanti en ogmantasyon minimòm 10%;

□ Etidyan ki sorti dan segonder pou antre dan en program pos - segonder, alawenns pour premye lannen pou sorti SR 850 pou mont SR 1,000, alawenns.

(APPLAUSE)

MINISTER NAADIR HASSAN

Pour dezyenm lannen pou sorti SR 950 pou mont SR 1,100 e pour trwazyenm lannen pou sorti SR 1,050 pou mont SR 1,200.

□ Etidyan ki lo bann program '*apprentiship*' zot alawenns pou konm swivan ; i pou sorti SR 1,400 pou vin SR 1,550 pou etidyan premye lannen e i pou sorti SR 1,600 pou mont SR 1,800 pou etidyan dezyenm lannen.

□ Etidyan ki pe swiv letid pour en Diplòm dan Ledikasyon Primer; pour premye lannen pou sorti SR 1,500 pou mont SR 1,700, alawenns pour dezyenm lannen pou sorti SR

2,000 pou mont SR 2,200 e pour trwazyenm lannen pou sorti SR 2,500 pou mont SR 2,700.

□ Etidyan ki pe swiv letid pour Diplonm dan Ledikasyon Segonder; pou premye lannen, zot alawenns pou sorti SR 2,000 pou mont SR 2,200, e, alawenns pou dezyenm lannen pou sorti SR 2,500 pou mont SR 2,700.

□ Etidyan ki pe swiv kour *ADHM* kot Lakademi Tourizm, zot alawenns pou sorti SR 3,000 e vin SR 3,200.

□ Revi spesyal in ganny fer pour ‘*mature students*’. Nou konstate ki bokou etidyan anba sa kategori zot deza annan en fanmir e ki zot depans i bokou plis ki en etidyan normal. Ozordi Alawenns pour bann ‘*mature student*’ i SR 1,800 dan tou sant profesyonnel - a leksepsyon Lenstiti bann ansenyan ki SR 6,000, si ou ti dan en lanplwa - e SR 3,000 si ou pa ti dan en lanplwa.

Apartir Avril 2025, alawenns ‘*mature student*’ dan tou sant profesyonnel pou mont SR 6,250.

(APPLAUSE)

MINISTER NAADIR HASSAN

E pou bann etidyan kot Lenstiti bann Ansensyan i pou mont SR 7,343.

(APPLAUSE)

MINISTER NAADIR HASSAN

Pour bann ki pa ti pe anploye avan kalifye pou antre dan en sant profesyonnel zot pou resevwar 50% sa alawenns. Tou bann ki dan sekter piblik e zot anplwayer ki anvoy zot etidye a plen tan dan sant profesyonnel zot pou resevwar zot saler anliny avek *PSO*.

Mr Speaker, sa bann sanzman dan alawenns pos segonder pou kout Gouvernman SR 7.6 milyon an 2025 e SR 10.1 milyon tou le-z-an, apre sa.

Benefis retrait/dezabibilite ek envalidite:

Mr Speaker, mon pou aprezan tous benefis dezabilite, benefis envalidite e benefis retrait. Ozordi nou annan nou apepre 14,550 dimoun ki pe resevwar sa trwa benefis. An 2022, Gouvernman ti donn en lasistans tanporer ziska en ‘*maximum*’ SR 500 pour endividi anba sa trwa benefis. Sa lasistans i ankor pe donner. Me, apartir Avril 2025 sa program lasistans tanporer pou nepli egziste e Gouvernman

pou revwar sa trwa benefis konm swivan;

□ Benefis retret: si ou kalifye pour Fon Pansyon avek en benefis plis ki SR 3, 250, ou benefis retret pou sorti SR 5,750 e mont SR 6,150.

(APPLAUSE)

MINISTER NAADIR HASSAN

Si ou kalifye pour fon pansyon avek en benefis mwens ki SR 3, 250 ou benefis retret pou sorti SR 5,750 e mont SR 6,400. Si ou pa kalifye fon pansyon ou benefis retret pou sorti SR 5,750 e mont SR 6,650. Par kont, tou benefisyer ki ti ganny sekirite sosyal avan kreasyon Fon Pansyon ki ozordi zot benefis retret i SR 6,250 zot benefis pou vin SR 7,150.

(APPLAUSE)

MINISTER NAADIR HASSAN

□ Benefis envalidite: si ou kalifye pour fon pansyon, ou benefis pou sorti SR 5,750 e mont SR 6,150. Si ou pa kalifye pour en benefis envalidite avek Fon Pansyon ou benefis pou sorti SR 5,750 e mont SR 6,650.
□ Benefis dezabilite pou ogmante sorti SR 5,750 e vin SR 6,650

(APPLAUSE)

MINISTER NAADIR HASSAN

Sa revizyon pou kout Gouvernman SR 121 milyon an 2025 e SR 162 milyon tou le-z-an. Mr Speaker, zis sa 3 benefis tousel pou kout Gouvernman en total SR 1.3 bilyon an 2025, sa sonm i reprezant 11% Bidze total Nasyonal.

Mr Speaker, apard ki sa benefis retret bann dimoun aze ki pe ogmante an Avril 2025, i osi annan lezot benefis adisyonnèl atraver Bidze e sa i konm swivan:

□ Zot kapab benefisyè avek tiket bis gratwit ki pour en *maximum* SR 1,680 par person, par mwan

□ Si i kalifye pour en 'carer' a plen tan, i pou kout SR 7,633 apartir Avril 2025. Sa i bann benefis avek en lenplikasyon monneter direk ki par mwan i kout an total SR 15,963 pour en pansyoner.

Mr Speaker, mon anvi sezi sa loportinite pou fer en lapel avek tou zanfan e tou pti zanfan ki annan zot manman/papa e gran manman/ gran papa ki dan zot laz retret, pou soutenir zot, me non pa kontinyelman abiz lo zot. Mr Speaker, dan bokou ka ou war ozordi ki bann dimoun aze ankor pe pran responsabilite primer dan en

lakour ki pa sipoze leka. Sak adilt ki travay, ki devret kapab pran son responsabilite anver son bann depans mon non pa depan lo larzan retret sa pansyoner.

18. Sekter Lakaz ek Later:

Mr Speaker, pandan sa 4 an ki nou administrasyon in o pouvwar, sekter lakaz in reste enn nou priyorite e zefor remarkab in ganny fer pou ed nou popilasyon annan zot prop lakaz. Gouvernman in fer alokasyon en total 287 *unit* lakaz abordab depi Zanvye 2021 ziska la, pour en kou total SR 317.2 milyon. E osi 29 *unit* akomodasyon tanporer pour en lavaler SR 22 milyon.

Dan sa Bidze, Gouvernman pou met bann mezir e polisi pou siport Seselwa pou konstrir zot prop lakaz, e anmenmtan i pou kontinyelman investir dan bann proze lakaz ek later.

Mr Speaker, an 2025, en alokasyon SR 527.2 milyon in ganny fer pour bann nouvo proze lakaz e sa i konm swivan:

- 30 younit, Ex-Desaubin (Faz 2) Takamaka – SR 10.4 milyon
- 80 younit - Zil Aurore (Faz 1) – SR 54 milyon
- 40 younit Vilaz Orkid (Faz 2) – SR 29.3 milyon
- 24 younit Corgate Estate (Faz 5) – SR 13.5 milyon

- 16 younit Union Vale (Faz 2) – SR 3.6 milyon

- 3 younit Lakaz “*Emergency*” Praslin – SR 3 milyon

- 16 younit Lari Hangard Mont Buxton - SR 13.9 milyon

- 4 younit lakaz “*Emergency*” La Digue – SR 3.5 milyon e

- 16 younit “*Mid Range Condos*” Bel Air – SR 14 milyon

Anmenmtan, Mr Speaker, nou pe ekspekte ki en total 156 younit lakaz ki’n fini konmanse e pou konplete an 2025. E la nou pe koz sa bann proze swivan;

- Ex-Zelia, Anse Boileau – 24 younit

- Anse Etoile (La Gogue) – 24 younit

- Amitie Grand Anse Praslin - 16 younit

- Anse Francois Pointe Laure - 16 younit

- Waterloo St. Louis- 16 younit

- Anse Poules Bleues (Faz 2) Baie Lazare -16 younit

- Vilaz Zanblon (Faz 2) Cascade -24 younit

- *Lower* Les Mamelles (Faz 2) - 8 younit

- Ex-St Ange, La Digue -12 younit

- E en total 56 ‘*Mid-Range Condos*’ Perseverance i osi ekspekte konplete e alokasyon lakaz ava fer an 2025.

Mr Speaker, an sa ki konsern proze ‘*land bank*’ pour

2025 en alokasyon SR 128.2 milyon in bidzete. Bann nouvo proze devlopman later ‘*land bank*’ ki pe ganny finanse anba Bidze 2025 i konm swivan;

- Port Glaud/Port Launay – SR 8.5 milyon
- Caryole faz 2 – SR 2.4 milyon
- Grand Anse Praslin – SR 3.8 milyon
- Anse Kerlan, Praslin – SR 4.3 milyon
- Pti Laval, Praslin – SR 2.6 milyon

I osi annan en alokasyon SR 20 milyon pou kontinyen lezot proze ‘*land bank*’ ki’n deza konmanse e osi pou konplet sa bann proze swivan:

- Fond Azore *Land Bank Extension* - Baie Ste Anne
- Ex Deltel Dan Banbou Anse Royale
- Cap St Marie *Land Bank* – Anse Boileau
- Barbarons *Land Bank*
- La Retraite *Land Bank*

Mr Speaker, Gouvernman pe osi vin avek bann linisyativ avek lobzektif fasilite nou popilasyon, pou swa repar oubyen konstrir zot prop lakaz. Enn nou partener kle dan sa demars i *HFC*. Gouvernman in fer revizyon dan son bann fasilite ki *HFC* i deza pe ofer e entrodwir bann nouvo, pou fer

son bann prodwi vin pli aksesib e abordab.

Mon pou mansyonn an zeneral bann revizyon e nouvo prodwir e *HFC* pou pli tar donn plis detay;

Prenan kont ogmantasyon dan pri konstriksyon ki annan lefe lo kou pou konstrir en lakaz, *HFC* pou ogmant sonm ‘*maximum loan*’ ki i ofer pou sa bann kategori *loan* swivan:

- Premye *Loan* lakaz: Pou ogmante sorti SR 1.2 milyon pou vin SR 1.5 milyon.

(APPLAUSE)

MINISTER NAADIR HASSAN

□ *Loan* pour en Dezyenm lakaz (*Second Housing loan*), pou ogmante sorti SR 550 mil pou vin SR 850 mil

□ *Loan* pou kouver lakaz konpletman (*complete re-roofing*), pou sorti SR 100 mil pou vin SR 150 mil

□ Skim pou lagrandisman lakaz (*House Extension Scheme*), pou ogmante sorti SR 100 mil pou vin SR 300 mil

(APPLAUSE)

MINISTER NAADIR HASSAN

□ Skim Pansyoner pou re-kouver lakaz konpletman (*Pensioner Home Improvement*)

Loan): *Loan* pou ogmante sorti SR100 mil pou vin SR150 mil

Mr Speaker, saler maksimonm pou kalifye pou serten kategori loan pou osi ogmante konm swivan:

□ *Loan* pour renovasyon mazer; Saler pou ogmante sorti SR 20 mil pou vin SR 25 mil (*net*) par mwan

□ *Home Improvement Loan*, pou sorti SR 15 mil pou vin SR 20 mil (*net*) par mwan

□ *Complete Re-Roofing Loan*; pou sorti SR 15 mil pou vin SR 20 mil (*net*) par mwan

□ *Survey Loan*; pou sorti SR 20 mil pou vin SR 30 mil (*net*) par mwan

Nou pe osi ogmant poursantaz repeyman vizavi saler aplikan - sa ki nou apel (*Debt service Ratio*), ki pou ogmante sorti 30% a 40% pou vin 30% a 45% pou premye e dezyenm *loan* pou konstrir lakaz e osi pou agrandi lakaz.

En lot sanzman dan polisi *HFC* se ki apartir Zanvye 2025, *HFC* pou konmans aksepte '*second line charge*' koman garanti pou serten fasilite - me sa i pou depan lo serten kondisyon ki *HFC* i ava elabor lo la pli tar.

En lot konsiderasyon kot i konsern garanti pour '*home improvement*' e '*complete re-roofing loan*', *HFC* pou konsider

met en sekirite lo sa propriyete koman lipotek, dan plas ki sa aplikan i bezwen en garanter. Sa pou aplikab dan ka kot en aplikan i annan en propriyete e i dan en lanplwa stab. Laranzman pou ganny fer ek son landrwa travay pour son repeyman '*loan*' i ganny dedwir lo son saler tou le mwan.

Mr Speaker, an se moman laz maksimonm ki en kliyan i gannyen pou repey son *loan* i 65 an baze lo laz retreat. Apartir 2025, *HFC* pou konsider peryod repeyman apre 65 an, dan ka kot i annan 2 aplikan kot laz sa dimoun pli aze a ganny konsidere, si zot satisfere lezot kondisyon. Sa i pou aplik pou premye e dezyenm *loan* lakaz selman.

Mr Speaker, bann lezot revizyon dan bann fasilite ki *HFC* i ofer i konm swivan:

□ *Loan* pou renovasyon mazer: Konstriksyon '*boundary walls*' e osi reparasyon miner pou ganny azoute lo lalis proze ki kalifye anba sa fasilite

□ Skim pansyoner pour renovasyon lakaz: En pansyoner ki'n deza fer laplikasyon pour en loan anba sa skim i pou aprezan kapab refer laplikasyon pour en lot, si in fini repey sa enn avan. Me i byen note i pa pou benefisyer avek sa 25% sibvansyon e son

dediksyon pou ganny fer direktman lo son pansyon.

En lot revizyon anba sa skim se ki pansyoner ki annan plis ki 75 an, pou kapab fer laplikasyon pour en loan renovasyon lakaz me i pou annan kondisyon atase ki *HFC* i ava donn plis detay lo la pli tar

□ Skim pou agrandi lakaz: Aplikan pou aprezan kapab agrandi lezot parti zot lakaz dan plas zis lasanm. Konstriksyon “*bedsitter*” pou osi ganny konsidere.

Mr Speaker, *HFC* pou osi entrodwir sa bann nouvo prodwi e skim an 2025;

□ Skim pou lagrandisman vertikal (*Vertical Extension Scheme*):

Sa skim i pou ankouraz paran pou donn permisyon zot zanfann pou azout en bout par lao zot lakaz. Apre ki paran in donn son zanfann permisyon, i kapab fer laplikasyon anba sa skim. Maksimonm *loan* pou SR 950,000.

□ Skim *Emergency Loan* pour pansyoner;

Sa nouvo skim i pou asiste sa group vilnerab dan bann sikonstans dezas kot zot kapab ganny akse avek en *loan* pou ranplas ou repar bann lekipman de baz e sistenm parey elektrik, desarz eksetera ki’n ganny andomaze.

Maksimonm *loan* pou SR100,000.

□ *Loan “Home Carer”*, dezabilite ek envalidite pour renovasyon/ amelyorasyon lakaz:

Prenan kont natir zot travay i fer li difisil pou bann ‘*home carers*’ kalifye pour en *loan* ek labank, sa loan i pou ed bann *Home Carers* ganny akse avek plis finansman pou fer renovasyon zot lakaz; kas ros, lanbelisman kot zot lakaz e osi pou rekouver zot lakaz. Maksimonm *loan* pour renovasyon i SR 50,000 e pou rekouver zot lakaz i SR 150,000.

Mr Speaker, ozordi *HFC* pe aplik de diferan to lenterer pour premye e dezyenm *loan* lakaz depandan lo kantite *loan* ki sa aplikan i kalifye. Pour en *loan* ziska SR 500 mil - to lenterer i 7% e en to lenterer 8 % pe ganny aplike pour en *loan* par lao R 500 mil ziska SR 1.2 milyon. Sa de to lenterer i o konpare avek menm kalite *loan* ki labank komersyal pe ofer, ki fer li pa abordab espesyalman pou aplikan ki zot saler i pli ba ki SR 20,000.

Pou asire ki *HFC* pe zve son rol pou ofer *loan* abordab, apartir le 01 Zanvye 2025 - to lenterer lo *loan* pou konstrir e osi pou fer devlopman vertikal pou vin 6% pou aplikan ki zot saler

i pli ba ki SR 20, 000. Gouvernman pou sibvansyon sa diferans ki *HFC* i sarze e sa in estimen pou kout apepre SR 1 milyon.

19. Sekter Transportasyon :

Mr Speaker, Gouvernman i reste angaze ek lenvestisman kontinyel dan sekter transportasyon pou amelyor kondisyon nou semen, konektivite, sirkilasyon e sekirite lo semen e osi siport lekonomi pou agrandi. En sonm SR 161.6 milyon in bidzete an 2025 pour lenvestisman kapital dan sa sekter.

Bann nouvo proze semen ki pou ganny finanse dan sa Bidze 2025 i enkli:

- Access Road La Gogue Danm site*- SR 2.5 milyon
- Amelyorasyon semen Kan Per, Praslin – SR 2 milyon
- Agrandisman semen Val den Dor (faz 2) - SR 1 milyon
- Dezyenm faz Gran Riviere, Anse Royale - SR 4 milyon
- Amelyorasyon semen Vilaz Pascal - Beau Vallon – SR 1.5 milyon
- Amelyorasyon '*link*' semen Ma Joie (Faz 2)- SR 1.5 milyon
- Bann proze mazer dan sa sekter ki ekspekte konplete an 2025 i Stasyon Teste Transpor Praslin e sa i en sonm SR 1.9 milyon in bidzete. I osi annan

en provizyon SR 32.5 milyon pou konplet proze semen was Mahe.

Mr Speaker, problemm konzasyon trafik sirtou dan bomaten avan travay konmanse e apre travay i reste en sours fristrasyon pour motoris. Solisyon pou rezourd sa problemm i konplike, anvi kontrent lespas pou fer semen adisyonel. Malgre sa bann defi, Gouvernman pe kontinyen rod opsyon pou amelyor sirkilasyon trafik. Avek sa antet, en proze '*third lane*' Pointe Larue in deza konmanse e sa i ekspekte konplete ver 2027. Sa proze i konmans kot erport e termin Anse Faure ki pou konekte avek Ile Soleil.

Premye faz proze i ekspekte konplete finisyon sa lannen e i ekspekte kout SR 7 milyon. Dezyenm faz sa proze ki konmans kot terminal kargo e pou fini kot lakonpanyen *Amalgamated Tobacco*, pe pas dan prosedir *Tender* e i ekspekte konmanse sa lannen. En sonm SR 13.6 milyon in ganny Bidzete an 2025 pou fer faz 2 ek 3 sa proze. Trwazyenm faz pou konmans kot lakonpanyen *Amalgamated Tobacco* ziska Anse Faure e konekte avek Ile Soleil.

En lot proze ki pe ganny finanse dan sa Bidze pou ede

amelyor sirkilasyon trafik i amelyorasyon ron pwen Providence ki pou al kot CCCL e lagrandisman '*lane by*' pou al lo *zone* 18. En sonm SR 1 milyon in Bidzete an 2025 pour sa proze.

I dan plan *SLTA* pou resirfas 30 kilomet semen primer ensi ki segonder e en sonm SR 71 milyon in ganny fer provizyon dan sa Bidze 2025. An sa ki konsern amelyor sekirite lo semen, e osi ede pour sirkilasyon trafik, en lot provizyon SR 1 milyon in fer pour en letid konmanse, pou evalye bann landrwa kot nou kapab konstrir bann '*overhead bridge*'. En sonm SR 1.5 milyon in osi ganny enkli dan sa Bidze pou rekonstrir e mentenir bann pon ki zot striktir pe ganny andomaze.

Touzour an sa ki konsern sekirite lo semen, nou'n fer en alokasyon SR 7.9 milyon dan Bidze 2025 pou finans ankor 50 lalimyer dan sak distrik lo Mahe, Praslin ek La Digue.

(APPLAUSE)

MINISTER NAADIR HASSAN

I byen note ki depi Zanbye 2021 ziska la - en total 3,450 nouvo lalimyer in ganny enstale e apepre SR 22 milyon in ganny depanse pou enstal e mentenir

sa bann lalimyer. Nou'n osi fer en alokasyon SR 5.5 milyon pour konstriksyon e mentenir drenaz ek trotwar dan bann distrik.

Mr Speaker, Gouvernman pou kontinyen siport devlopman kapital pour *SPTC*. Dan mwayen term en sonm SR 42.7 milyon pou al anver akizisyon nouvo bis, ki pou enkli 2 bis elektrik pou etidye fezabilite bann tel bis. En sonm SR40 milyon pe osi ganny bidzete pou kouver bann proze lenfrastriktir.

Mr Speaker, an sa ki konsern nou bann fasilite portyer, Lotorite Por Sesel in pandan sa bann dernyen lannen angaz li dan redevlopman e konstriksyon nouvo fasilite. Lobzektiv se pou donn en meyer servis a tou bann ki servi sa bann fasilite. Sesel pe devlop vitman e Lotorite Por pe trouv li dan en pozisyon kot i bezwen akseler devlopman son bann fasilite. An 2023, Praslin in ganny li en nouvo terminal pasaze, apele *ERO*, ki konstriksyon ti konmanse an 2021 lo Zil Eve. I dan plan Lotorite Por pou kontinyen amelyor sa terminal pou azout bann servis esansyel pou desarze e stokaz kargo.

An 2024, en lekspresyon lentere pou fer devlopman lo

later lo Zil Eve, ki osi ganny zere par Lotorite Por, ti ganny fer par Bord Lenvestisman Sesel. Nou'n vwar partisipasyon 3 investiser ki'n ganny bay pou fer bann devlopman komersyal e en marina. Nou ekspekte ki plis devlopeur prive lo Praslin i pran sa bann loportinite ki pe ganny met a zot dispozisyon, pou kontinyen anmenn devlopman lo sa zil.

Mr Speaker, Lotorite Por i annan plan pou konstrir en nouvo terminal pasaze lo por La Digue lannen prosenn, ki ava furni zot avek plis konfor ler zot pe esper bato. Dan plan pour sa nouvo terminal, i annan lespas komersyal pour bann Digwa kapab lwe pou fer zot biznes.

(APPLAUSE)

MINISTER NAADIR HASSAN

Zis pou fer rapel ki Por La Digue in fek fini pas anba en travay pou agrandi sa fasilite, pou permet pli gro bato koste por. Lobzektif sa proze se pou separ pasaze ek kargo, pou rann li pli konvenab pour tou bann ki servi sa pti por.

Mr Speaker, depi 2018, Lotorite Por pe zer bann morso later e fasilite portyer Bel Ombre. Sa Lotorite i dan faz pe

rod investiser pou fer bann devlopman komersyal lo sa bann morso later. I annan pour le moman en investiser ki pe al ganny bay pour en morso later pou fer en devlopman komersyal e touristik.

Mr Speaker, pli gro proze Lotorite Por se byensir lagrandisman Por Komersyal ki deservi bann bato '*container*', tenker ek bato ki transport siman. Esansyelman se sa por ki fasilite tranzaksyon komers nou pei avek larestan lemonn, atraver eksportasyon ek lenportasyon.

Sa por ki ti selebre son 50 an 2023 i kritik pou lekonomi nou pei. Nou pe war ki lakantite *container* ki pe rantre dan pei pe ogmante. Pour sa 2 dernyen lannen nou'n war plis ki 80 mil *TEU*, ekivalan 20 pye pas dan Por Komersyal. Nou ekspekte sa lannen ki plis ki 90 mil *TEU* i pas atraver nou Por. Sa por i dan en leta ase degrade e i plis ki ler pou sa ekstansyon ganny fer.

Lekspresyon lentere pou konstriksyon lasose ti lanse an Mars sa lannen e nou ekspekte ki '*tender*' pou lanse mwan prosen. Sa pou fer ki kontrakter prefere pou ganny anonse an Avril lannen prosenn e konstriksyon pou konmanse an Novanm 2025. Sa proze ki

anvize ganny fer dan 2 an i ekspekte fini an Me 2027.

Lekspresyon lentere pou operater 'container' pou lanse a la fen sa lannen, e nou ekspekte ki a lafen 2025 kontra pou'n fini ganny sinyen avek sa operater ki pou investir dan bann lenfrastruktir par deryer lasose (sa ki nou apel '*back of quay facilities*') tel ki bann '*yard*', '*warehouse*', lofis administratif pour sa operater e fasilite pou Ladwann e lezot lazans ki kontrol lafrontyer, e dan bann lekipman konman '*mobile harbour cranes*' pou deservi bann pli gro bato e pli modern ki napa '*crane*' abor. Dapre program sa proze, loperasyon lo nouvo terminal i sipoze konmanse an Zanvye 2028.

20. Sekter Lanvironnman, Lenerzi ek Sanzman Klima :
Mr Speaker, lefe sanzman klima e son lenpak lo nou lanvironnman e nou sosyete an zeneral, i reste pli gran defi pour nou pei dan sa peryod ki nou pe viv ladan. Pour Sesel, lefe sanzman klima nepli enn ki nou zis koz lo la koman en keksoz ki pou arive dan lavenir, me in fini vin en realite. Tou le zour nou war lefe lo nou lakot koze par nivo lanmer ki'n mont pli O. Nou war plis bann lensidan klimatik pli sever,

parey plis lapli ki koz linondasyon e deboulir later. Nou pou osi war sanzman dan tanperatir e osi bann peryod letan abnormal, kot swa nou kapab ganny plis lapli oubyen nou letan sek i prolonze.

Nou war bann levennman kot nou bann koray pe ganny detrir aköz nivo tanperatir losean i pli O. Frer/ser Seselwa sa i en keksoz serye ki nou pe fer fas avek. Legzistans nou pei i an kestyon. In ler pour nou met lide e zefor ansanm pou protez nou pei e ed li adapte avek sanzman klima.

Parey nou okouran, zefor pour nou minimiz e adapte ek lefe sanzman klima pou kout bokou larzan. Bann letid fer par Gouvernman Sesel avek sipor bann eksper enternasyonal, anba '*Nationally Determined Contributions*' in estimen i kapab kout US\$670 milyon pou enplimant sa bann mezir. Sa i en sonm larzan ki Sesel pa pou kapab *afford* lo li menm.

Gouvernman in fini konmans demars pou mobiliz finansman pou enplimant diferan mezir. Avan finisyon sa lannen, nou pou adopte en stratezi pour nou mobiliz resours finansman relye avek sanzman klima 2025-2030. Pou note, Gouvernman in konmans mobiliz resours domestik par

lentrodiksyon en taks lanvironnman soutenabilite lo bann viziter.

An Fevriye 2025, Gouvernman pe organiz en 'roundtable' enternasyonal avek led Fon Monneter Enternasyonal pou anmenn diferan partener domestik ek enternasyonal, pou diskit lo bann diferan lasistans ki Sesel i kapab gannyen, pou ed li mobiliz resours finansyel ek teknik, pou enplimant son bann proze ek linisyativ pou konbat kont lefe sanzman klima e osi adaptasyon.

Lo kote enternasyonal, Sesel i ankor pe lite pou fer sir i osi kapab benefisye avek bann promes kin ganny fer; par egzantp pour "*Loss and Damage Fund*". Sesel i ganny reprezante dan sa bann *forum*, kot nou toultan servi loportinite pou prezant nou pozisyon, me parey zot konnen progre i dousman e pa toultan ekitab.

Mr Speaker, dan mon Ladres Bidze lannen pase, mon ti anonse ki i kritik ki nou pei i akseler son tranzisyon ver lenerzi renouvlab. Sa i pa zis aköz lefe negativ lo lanvironnman e klima, ki sistenm prodiksyon elektrisite an servi karbiran i anmennen, me osi pou rezon stratezik, pou asire ki Sesel pa ganny afekte

avek bann tansyon zeopolitik ki bokou letan i enfliyans pri karbiran.

Avek sa Mr Speaker, Gouvernman pe akseler son zefor avek bann mezir spesifik pou kapab prodwi plis elektrisite atraver bann sours renouvlab. An term prodiksyon, travay lo en nouvo '*PV floating lagoon*' in komanse e sa i ekspekte prodwir 5 *MGW* lenerzi. Gouvernman ansanm ek *PUC* i osi dan diskisyon tre avanse avek en lot lakonpanyen ki prodwi lenerzi renouvlab pou konmans en proze ki annan potansyel pou prodwi apepre 2.5 *MGW* lenerzi La Digue e osi 4.5 *MWH* sistenm batri ki stor lenerzi, e osi 6 *MGW* lo Mahe, ki ekivalan 1.5% nou konsonmasyon.

Enn bann kontrent pli sever ki nou fer fas avek dan prodiksyon lenerzi renouvlab, se nou napa ase later pou enstal par egzantp bann pano soler. Pou adres sa problemn, i esansyel ki nou servi maksimonm nou bann twatir pou enstal bann pano soler. Pou fer sa arive, Gouvernman pe met anplas en nouvo skim pou ankouraz plis lakaz rezidansyel e osi biznes pou al dan sa direksyon. Sa i ava ranplas sa skim avan ki ti nepli pe marse.

Pour lannen 2025, Gouvernman pe revwar skim 'PV Rebate' dan son totalite avek bi pou relans li pou ankouraz plis lenvestisman par konsonmater rezidansyel e bann pti biznes. Sa nouvo skim pou donn endividi ki enstal en sistenm PV en rediksyon lo zot kou total ki pou ganny peye par Gouvernman konm swivan;

- Pour en sistenm avek kapasite 1KW – SR 10,500
- Pour en sistenm avek kapasite 2KW – SR 21,000 e
- Pour en sistenm avek kapasite 3 KW - SR 31,500

Pour pti biznes ki annan en reveni pli ba ki SR 6 milyon benefis pou konm swivan;

- Pour en sistenm avek kapasite 5KW – SR 36,000
- Pour en sistenm avek kapasite 10KW – SR 72,000 e
- Pour en sistenm avek kapasite 15KW - SR 108,000

Anplis ki sa, anba sa skim, konsonmater rezidansyel pou kapab pret larzan avek labank komersyal pour en 'loan' ziska SR 150,000 avek en to lentere 5%, avek en repeyman ki pou ganny fer pandan en maksimonm 7 an. Sa i ava ede ki plis endividi i satisfere kriter labank pou akse sa 'loan'. E pour bann pti biznes, zot pou kapab pret larzan avek labank komersyal

pour en 'loan' ziska SR 250,000 avek en to lentere 5% e repeyman pou ganny fer pandan en peryod maksimonm 5 an.

Dan Bidze 2025, Gouvernman in met en sonm SR 5 milyon pour sa kontribisyon anver sibvansyon sa linisyativ pano soler, e SR 2 milyon pour sibvansyon sa to lentere ki labank komersyal i sarze. Alor mon demann konsonmater rezidansyel e sa kategori biznes, pou pran sa bann loportinite pou fer sa lenvestisman ki zot a kapab war en rediksyon lo zot pri elektrisite.

Mr Speaker, Gouvernman pe osi bezwen fer son bout. Ozordi Gouvernman pe depans environ SR 160 milyon an mwayenn par lannen lo peyman elektrisite. Alor an 2025, en sonm SR 10 milyon in bidzete pou investir dan lenstalasyon pano soler lo twatir bann batiman Gouvernman.

Pou ankouraz bann biznes ki dan sekter lenerzi renouvlab, sa lannen, Gouvernman in donn senk an adisyonnal konman benefis pour bann lakonpanyen an term 'loss carry forward'.

Gouvernman i osi realiz lenportans prodiksyon lenerzi renouvlab. Me pou sa vin en

realite nou bezwen osi asire ki nou grid distribisyon lenerzi, i kapab soutenir prodiksyon eleve ki nou antisipe dan sa sekter. Nou pou bezwen osi repozisyon *PUC* pour li kapab partisip dan sa transformasyon. Pour sa arive bokou lenvestisman dan grid distribisyon pou bezwen ganny fer. Sa pou osi ganny siporte avek bann evalyasyon e lezot lasistans teknik.

Gouvernman i dan diskisyon avanse avek Labank Mondyal ek lezot partener, pou siport sa linisyativ lo en plan teknik ek finansyer. Sa i pou ariv en kou preski *US\$37.3* milyon ki nou ava prete avek bann kondisyon vreman konsyesonnel a lonterm.

Nou osi pe finaliz en plan resours entegre pour sekter lenerzi, ki pou etabli en lapros kordinen dan tranzisyon anver bann sours lenerzi renouvlab. Sa plan i ekspekte konplete ver lafen Mars 2025. Sa plan i ava ed nou pou vwar lezot lenvestisman ki nou bezwen fer dan sekter.

Lo kote proze adaptasyon kont lenpak sanzman klima, Gouvernman pe osi fer en alokasyon *SR 18.1* milyon dan sa bann proze swivan;

□ Proze rehabilitasyon lakot Anse Konsolasyon - *SR 2.7* milyon

□ Proze rehabilitasyon lakot Aux Cap - *SR 2.7* milyon

□ Konstriksyon Drenaz Carana-*SR 2.7* milyon

□ Amelyorasyon dan kapasite pou retir delo dan plato La Digue - *SR 1.4* milyon e

□ Amenazman e lentegrasyon sistenm lakot Anse Royale *Beach Park* - *SR 2.7* milyon

Mr Speaker, pli ale nou pe war plis lenpak sanzman klima lo nou bann lenfrastruktir obor lakot ki enkli semen. Koman en pei nou bezwen vin pli aktiv lo proteksyon e rehabilitasyon nou bann lenfrastruktir kont sanzman klima. Anliny ek sa - en sonm *SR 115* milyon in mete dan Bidze pour sa prosen 3 an pour *SLTA* enplimant proze proteksyon e rehabilitasyon lenfrastruktir semen lo lakot.

Bokou resours e lenvestisman in ganny mete dan sa sekter, me nou pou bezwen fer plis ankor a lavenir, pour nou kapab finans sa stratezi. Avek lespas fiskal nou pe prozekte *SR 37* milyon an 2026 e *SR 62* milyon an 2027 pour nouvo proze ki relye ek sanzman klima.

Mr Speaker, en lot gro problemn ki nou pe fer fas avek i amenazman salte. An 2025 i

annan diferan mezir ki nou pe finanse dan sa domenn. Nou'n fer en alokasyon SR 17.9 milyon pour proze amenazman 'Solid Waste'. Bann konponan enportan sa proze se pou revwar amenazman salte lo 'landfill'. Nou pou bezwen reorganiz litalizasyon lespas lo 'landfill' ki ava ed nou ogmant son kantite letan ki nou kapab servi li ankor.

En lot konponan sa proze se pou entrodwi bann mezir pou promouvwar 'circularity' e osi redwir salte ki pe ariv kot 'landfill'. Analiz ki'n ganny fer, in war ki plis ki 40% salte, i bann ki nou kapab fer konpos avek. Sa bann mezir a kapab kre nouvo loportinite biznes pour nou sekter prive.

Mr Speaker, Sesel pe kontinyelman fer fas avek lenpak sanzman klima, kot konmela nou pe eksperyans plis peryod gro lapli, lanmer mont e linondasyon. Le 6 Desanm 2023 ti montre nou ki manner nou tre vilnerab kont sa bann eleman natirel. Alor pou esey redwir lenpak sa bann katastrof natirel, Gouvernman pe fer en alokasyon SR 14.7 milyon anba Bidze Divizyon Amenazman Risk relye ek Dezas.

Sa alokasyon in vin apre apre ki en analiz ti ganny fer e

identifye bann landrwa en pe pli kritik, ki bezwen stabilizasyon pou redwir lenpak bann aksyon parey glisman later e ros. En alokasyon in ganny fer dan Bidze 2025 pour ki sa proze i demare. E dezyenm faz sa proze pou ganny fer en 2026.

Bann levennman advers parey gro lapli e deboulisman later pe vin pli souvan an reziltan sanzman klima. sa i annan en lenpak direk lo Bidze pei kot bann depans enprevi i bezwen ganny fer dan 'Contingency Fund'. Sa metod i nepli efikas e nou pe travay lo en nouvo striktir pou annan en 'Disaster Financing Strategy'. Sa i ava ed nou planifye pli byen e osi asire ki nou annan resours finansyel pou fer fas avek bann dezas ki arive.

Gouvernman i an diskisyon tre avanse pou finaliz en program ki ava ed nou servi bann diferan lenstriman finansyel, pou adres bann kouler en dezas i arive. Sa i ava enkli en Fon Rezerv ki ava akimile ek letan e ki kapab ganny servi letan en evantyalite i arive.

Sa bann linyativ pou nesesit revwar lankadremant Zesyon Fon Piblik, pour nou enplimant sa bann sanzman. En provizyon dan konstitisyon e

Lalwa ki gouvèrn Zesyon Fon Piblik i deza etabli en 'Contingency Fund'. Me nou bezwen revwar sa lankadremman pou fer sir nou azour avek realite ozordi.

21. Transformasyon Ekonomik :

Mr Speaker, transformasyon ekonomik i reste la baz pour ki nou lekonomi i kontinyen agrandi, vin pli rezilyan e kree plis larises pour nou popilasyon. Diversifikasyon nou lekonomi i reste en priyorite, me selman i annan bokou defi pou realiz sa lanbisyon, sa i akòz grander nou pei, en mankman later e osi lezot resours natirel. Sa i vèdir ki nou bezwen konsantre lo selman serten sèkter ki nou annan lavantaz ladan.

Nou'n war ki nou sèkter finansyel, avek nimerik i kontinyen agrandi avek bann linisyativ ki Gouvèrnman i met anplas.

An 2025, Gouvèrnman pou kontinyen ek son azanda pou transform nou lekonomi atraver bann lenvestisman dan sèkter ekonomik e bann polisi ek mezir pou fasilite fer biznes dan pei. En total SR 49 milyon pou ganny envestir dan bann lenfrastruktir pou sipòrt pti e mwayen biznes lannen prosenn. Nou annan en;

□ Nouvo sant mikro antrepriz Anse Aux Pins – kot SR 5 milyon in ganny Bidzete an 2025 pou konmans konstruksyon. Sa sant ki pou kout en total SR 23 milyon.

□ Nouvo sant antrepriz 'Marine and Auto Industrial Park' – SR 3 milyon

□ Perseverance 'Bulk Infrastructures' – SR 5.8 milyon

□ Renovasyon Sant mikro antrepriz Grand Anse Praslin – SR 2.9 milyon

□ Developman lenfrastruktir faz 2 lo Zil Eve – SR 25.5 milyon

□ Proze drenaz, lenfrastruktir semen ek trotwar dan zone endistriyel Providence – SR 6.2 milyon

□ Proze developman Beau Vallon - En sonm SR 7.5 milyon in ganny mete dan Bidze pour sa proze ki ekspekte konplete an Fèvriye 2025. Bann aktivite e fasilite pou konmans ver Zen 2025, vi ki apre konstruksyon i pou pran en pe letan pou bann alokater enstal zot bann lekipman. Sa bann kiosks pou donn loportinite 40 pti e mwayen biznes pou montre e vann zot bann prodwi.

Mr Speaker, *Victoria Waterfront* i annan en rol enportan pou zwe dan fer nou kapital vin pli atiran e dinamik pour tou rezidan ek touris, e Gouvèrnman i angaze pou

transform *Victoria Waterfront* dan en sant kiltirel ek komersyal vivan. Redevlopman pou arive par faz. Faz 1 i konpri ansyen landrwa kot ‘*ex-children playground*’. Sa landrwa in ganny divize dan sa bann ‘zone’ swivan:

a) *Zone A* – Vilaz Kreol pou ofer en leksperyans kiltirel ek gastronomik ki selebre vre kiltir Seselwa, ki enkli en restoran Kreol.

b) *Zone B* pour en ‘zone’ Divertisman, avek kantite kalite aktivite pour tou laz dimoun.

c) *Zone C* – En ‘*waterpark*’ e

d) *Zone D* – En *Boardwalk/Marina* avek bi pour vin en gran pronmnad dan *Waterfront*, ki osi enkli en lotel ki pou annan en limit 30 lasanm.

Nou espere ki premye kar 2025, tou louvraz ‘*tender*’ pou ganny akorde e bann investiser pou kapab konmans prosedir pou fer devlopman. Plan pou dezyenm faz pe ganny diskite e an 2025 Gouvernman pou partaz konsep pour sa faz.’

Mr Speaker, parey mon ti mansyonnen dan mon diskour pour lannen 2024, pour nou kapab bouz lo prosen staz devlopman ekonomik, nou pou bezwen plis later. Alors Gouvernman i annan plan reklamasyon e en provizyon SR

51.6 milyon in ganny fer dan Bidze 2025. Sa i anplis ki sa sonm SR 279 milyon ki ti dan Bidze 2024. Sa proze pou enkli;

□ Ogmant stok disab pour konstriksiyon ki pou ekivalan ant 500,000 a 800,000 met kib

□ Agrandisman Ile Aurore par 180,000 met kare

□ Agrandisman *Zone 20* par 110,000 met kare

□ Devlopman *Zone 5* par 240,000 met kare

Mr Speaker, Minister Lenvestisman, Lantreprenarya e Lendistri in travay pour plis ki 3 an avek bann diferan Minister, Departman pou revwar bann prosedir e standar pou amelyor lanvironnman biznes. Sa i avek bi fer bann prosedir vin pli fasil e pli transparan.

Gouvernman pe etabli en Unit ki pou tonm direk dan Minister Lenvestisman, Lantreprenarya e Lendistri, pou asiste biznes pou ede donn gidans e kordin avek lezot Minister. Sa i avek bi azir koman en azan lo par biznes ki ava pe zet en regar direk lo sak problem ki ganny met devan an relasyon avek servis Gouvernman- menm avan zot ariv sa pwen pou soumet zot laplikasyon kot Biro *Licensing*.

Sa *unit* pou finalman ganny agrandi pou vin en sant

fasilitasyon biznes permanan. Proze i dan staz '*design*' e i pou demare lannen prosenn. Sa sant pou dedye koman en pwen kot biznes pou ganny akse avek lamazorite bann servis Gouvernman. Menm konseps pou ganny adopte, kot nou pou met bokou lanfaz lo '*customer service*' kot en biznes ava ganny konsey e kapab fer tranzaksyon dan en sel landrwa dan plas bezwen al kot plizyer landrwa, parey i ete konmela.

Antretan, Gouvernman pe kontiny son travay pou amelyor '*Ease of Doing Business*' dan en fason pli vit e pli direk. Sa i annakor avek nou zefor pou bouz nimerik dan laplipar nou bann servis. Travay i kontinyen pou devlop nou '*Investment Portal*'. Sa i sa platform nimerik ki pou permet investiser e biznes fer zot bann demars virtyelman. Sa proze in antre dan staz evalyasyon e i ekspekte konplete an 2025.

Sa sistenm pou anmenn plis efikasite dan bokou bann prosedir ki en biznes i bezwen tel parey, anrezistremans biznes, laplikasyon GOP, laplikasyon license, permi lenportasyon e lezot.

Mr Speaker, parey tou dimoun i okouran, pou nenport ki sistenm nimerik marse, sa prosedir ki souliny sa bann

servis i bezwen modernize li osi. Alors, pou siport nou demars, Minister Lenvestisman pe met bokou lanfaz pou moderniz nou bann lalwa '*licensing*' ki tonm anba biro '*Licensing*'. Travay pe ganny fer lo tou regilasyon neserer. Nide se pou retir bann gran prosedir birokrasi, konsiltasyon ki met baryer pou en biznes ganny en *license*. Sa i pou fasilite bann prosedir ki ava fer li pli vit pou biznes ganny en *license*. Par kont, an fezan sa - bokou plis responsabilite pou bezwen tonm lo sa biznes limenn, pou fer sir ki tou son bann standar i an plas. Pareyman, provizyon ava ganny fer pou ki bann ki pa respekte standar i ganny penalize.

Parey ou vwar Mr Speaker, sa Gouvernman i pe pran aksyon serye dan bann landrwa konsernen. Nou lenter se fer plis pou retir fristrasyon, vi ki sa fason fer in enkilke pandan plizyer lannen. I pou bezwen annan en sanzman dan latitud e fason fer e panse parmi plizyer antite. Gouvernman i angaze pou fer sa arive.

Dan sa menm laliny byento Gouvernman pe al entrodwir en linisyativ ki apel zero birokrasi. Anba sa program tou Minister ek Lazans pou ganny demande

pou idantifye bann prosedir biyokratik e propoz nouvo fason fer pou retir sa bann lobstak. Sa pou ganny fer pandan en peryod 4 mwan, lannen prosenn. Sa legzersis ava ganny fer tout an konsiltasyon avek manm piblik, biznes e sosyete sivil.

Mr Speaker, en lot linisyativ ki Gouvernman pe pran pou amelyor lanvironnman biznes, i lantroduksyon en Lakour Komersyal. Sa Lakour pou ekout zis bann ka ki annan sa laspe komersyal - tel ki lasirans, tranzaskyon finansyer e pre ki enkli kontra, propriyete entelektyel, parmi lezot ankor. Sa i ava permet bann tel ka ganny 'deal' avek pli vit e en rezolisyon a ganny pran pli vit. Sa Lakour pou form par Lakour Siprenm e i pou annan en Ziz a plen tan. Sa Ziz pou annan pa plis ki 6 mwan pou rann zizman ou en rezolisyon dan en ka. En sonm SR 4.9 milyon in ganny bidzete an 2025 pour loperasyon sa lakour.

22. Sekter Lapes ek Lekonomi Ble :

Mr Speaker, nou'n osi investir bokou larzan dan bann fasilite atraver pei e nou'n gard nou promes pou amelyor kalite lavi nou bann peser. Bann proze

por, bazar, *gear store*, pou kontinyen lannen prosenn avek nouvo fasilite modern dan sa bann distrik swivan:

- Fasilite Lapes – Anse La Mouche
- Fasilite Lapes- English River
- Fasilite Lapes- Glacis - pou konplete 2025

Mr Speaker, avek proze "*dredging*" ki Lotorite Por pe fer dan distrik Bel Ombre sa pou ed bann peser dan sa distrik. Travay i ekspekte konmanse tar sa lannen pou devlopman lenfrastruktir lo Ile Du Port, e lannen prosenn en alokasyon SR 42 milyon in ganny mete dan Bidze pour sa proze. Sa pou enkli nouvo semen, lenfrastruktir desarz, delo, elektrisite ek telekominikasyon. Ile du Port in ganny demarke koman en landrwa kot sekter '*fish processing*' pou baze.

Apartir Zanbye 2025 Lotorite Lapes Sesel (*SFA*) an partenarya avek Linyon Eropeen, pou entrodwi en nouvo skim pansyon pou ankouraz peser kontribye anver zot pansyon lo en baz volonter. Tou peser ki enterese pou partisip dan sa skim, zot bezwen kontribye 5% e *SFA* pou kontribye sa lot 5%. En sonm SR 500,000 pou ganny Bidzete tou le-z-an par *SFA*. Dan sa

skim, labaz kontribisyon pou baze lo saler minimonm.

Gouvernman pe osi fasilite negosyasyon ant bann 'stevedores' e bann lazans ki anploy zot pou revwar zot benefis.

23. Sekter Lagrikiltir:

Mr Speaker, Bidze pour sekter lagrikiltir pour lannen 2025 i SR 142 milyon. Priyorete Gouvernman i reste pou ogmant prodiksyon agrikol, amelyor valer azoute, fer sa sekter vin pli soutenab e anmenn nouvo teknolozi. Gouvernman pe kontinyelman etidye pli bon fason pou siport sa sekter e alor nou pou osi amelyor alokasyon kredi pour lenvestisman dan lagrikiltir e amelyor konesans bann fermye ek bann biznes.

Mr Speaker, pou fasilite akse avek finansman pour fermye, pou annan serten lamannman dan skim Fon Devlopman pour Lagrikiltir (ADF) pour lannen 2025. Anba sa skim an se moman, en later lagrikiltir lo en 'leasehold' i kapab ganny servi koman sekirite kont en *loan* ziska lavaler SR 350,000. Nou rekonnet ki i annan en gran valer dan later lagrikiltir, e ki tel later i an demann.

An menm tan, nou rekonnet ki bokou fermye i annan limitasyon dan lezot sekirite ki zot kapab ofer kont en *loan*. Alor, nou pe ogmant lavaler *loan* ki kapab ganny sekirize avek later lagrikiltir 'leasehold' pou vin SR 850,000, pourvi sa i reprezant pa plis ki 70% valer sa later. Nou pe osi ankouraz transformasyon dan sekter lagrikiltir, e anliny avek sa, nou pe fer sir ki bann term tel ki 'agro-tourism' e 'agro-forestry' i ganny enkli dan sa skim e byen defini pou permet bann tel proze ganny finanse anba ADF. Bann "specialised vehicles" - setadir bann veikil ki bezwen formasyon spesifik pou fer marse e ki ganny servi pou lagrikiltir, pou osi ganny kouver.

Dan Bidze 2025, en sonm SR 5 milyon pou ganny azoute dan sa fon ki pou siport sa SR 63 milyon ki Gouvernman ti mete an 2024. Apartir 2026, alokasyon bidzeter anba sa fon pou monte e vin SR 30 milyon par an.

Sa soutyen finansyel ava ede siport nou bann fermye anvi son bann kondisyon preferansyel. Par egzanp en *loan* ziska SR3 milyon son to lentere i 2.5% e pour en *loan* par lao SR 3 milyon, to lentere i 5%. Maksimonm peryod

repeyman i 12 an. Nou ekspekte ki sa fasilite finansman i a ed ferme pou devlop zot proze pou kontinyen ogmant prodiksyon lokal.

Mr Speaker, i bon fer note ki dan Bidze i enkli sa sibvansyon pou ferme ki prodwi;

□ lavyann poul ki SR 2.30 par kilo.

□ lavyann pork ki SR 6.50 par kilo.

Tandis i annan osi sibvansyon lo kou labatwar, kot ozordi i kout SR 500 pou touy en koson kot labatwar. En ferme i pey SR 200 e Gouvernman i sibvansyon SR 300 e pour lavyann poul, sa fre labatwar i kout SR 7 ozordi, kot Gouvernman i sibvansyon SR 4 e ferme i pey SR 3.

An plis ki sa, Gouvernman i osi sibvansyon fre transportasyon pour manze zannimo avek '*layer chick*' sorti Mahe pou ferme Praslin ek La Digue. Dan sekter lagrikiltir Gouvernman in konstrir en nouvo batiman resers e sa in kout SR 9.2 milyon. In annan renovasyon lo sant zenetik pou elevaz zannimo, ki'n kout SR 3 milyon. In annan amelyorasyon servis laboratwar ek klinik veteriner pour en lavaler SR 2 milyon, e konstriksyon semen kot serten laferm ki'n ariv anviron SR 10.7 milyon.

Avek bi kontinyen investir dan sa sekter, en alokasyon Bidze SR 32.6 milyon pe osi ganny fer pour bann diferan proze lagrikiltir pour lannen 2025. Sa i pou enkli bann proze swivan;

□ SR 6.5 milyon pour konstriksyon biro lagrikiltir Union Vale;

□ SR 2.5 milyon anver proze semen;

□ SR 3 milyon pe ganny Bidzete pour sistenm irigasyon

□ SR 8 milyon pou konstriksyon nouvo labatwar lo Mahe, ki pou baze lo *zone* 18 Providence

□ Renovasyon Bazar Victoria in demare depi 2023 e en alokasyon Bidzete SR 3.2 milyon in ganny mete pour lannen 2025.

24. Lord ek Lape

Mr Speaker, pour nou tou kontinyen viv byen, epanouir, e kontinyen progrese, koman en nasyon, nou bezwen asire ki i annan lord ek lape ki rennyen dan nou pei. San lord ek lape tou nou lakonplisman pa pou abouti dan nanryen. I pour sa rezon ki enn bann sekter priyorite dan nou Plan Devlopman Nasyonal 2024/2028 i promouvwar Lord e Lape.

Pour lannen 2025, Minister Zafer Entern pe ganny en Bidze SR 743.4 milyon. Departman Imigrasyon ek '*Civil Status*' in akonpli bokou pandan sa lannen, sirtou an servi teknolozi pou ofer zot servis a zot kliyan. Zot in lans kart idantite vertyel lo platform '*SeyID*' pour tou endividi ki annan permi pou reste Sesel. Zot in osi entrodwir '*CertExpress*' ki en platform elektronik ki ed tou sitwayen Seselwa pou ganny en sertifika nesans, maryaz ouswa lanmor san bezwen vizit sa Minister.

An 2022, Sesel ti entrodwir son paspor biometrik. An 2024, sitwayen Sesel ki reste Lafrans, *Grande Bretagne* ek Lemirat Arab Ini pe kapab fer zot laplikasyon e kolekte zot paspor dan sa bann pei menm. An 2025, sa servis pou ganny enplimante pour nou bann sitwayen Ostrali ek Kanada.

En lot proze ki Gouvernman pe travay lo la se anrezistremans nesans. Dan plas fer sa paran deplase pou vin kot biro lanrezistremans pandan ki sa manman i dan son konze maternite, tou keksoz i kapab ganny fer dan lopital.

Mr Speaker, dan sa sekter lord ek lape pour lannen 2025,

Gouvernman pou investir SR 103.9 milyon dan sa bann proze swivan;

□ Konstriksyon kordgard Perseverance i dan staz prokirman e pou konmanse an 2025. En sonm SR 9 milyon pe ganny Bidzete;

□ Renovasyon kordgard Baie Ste Anne Praslin pou konplete dan premye kar 2025 e in ganny en alokasyon SR 2 milyon;

□ Konstriksyon akomodasyon pour travayer departman lapolis ki pou konmanse an 2025 - SR 3.4 milyon

□ Konstriksyon fasilite '*Marine Police*' - SR 43.9 milyon

□ Travay kontinyasyon lo '*Maximum Security Prison*' ki nou ekspekte konplete an 2025 - SR 5.5 milyon

□ Premye faz sant rimann pou konplete an Novanm 2024. Konstriksyon pou dezyenm faz pou demare an 2025 e en sonm SR 5 milyon in ganny prozekte; e

□ Konstriksyon en nouvo batiman pou medikal e lakwizin pour Departman Prizon - SR 10 milyon.

25. Revizyon dan Polisi Taks

25. 1 Revizyon striktir taks lo saler ek benefis non-monneter pou lentrodiksyon en

deklarasyon taks par bann endividi

Mr Speaker, aprezan nou avabou z lo bann nouvo polisi taks ki Gouvernman pe al entrodwir. Premyerman i annan taks lo saler ek benefis non-monneter ki ti entrodwir an Zilyet 2010 apre ki dediksyon sekirite sosyal lo saler ti ganny aboli. An semoman sa to taks ki progresiv i ant 0 a 30%.

14 an pli tar, Gouvernman pe vin avek en lot faz reform lo taks lo saler ek benefis non-monneter pou lentrodiksyon en deklarasyon taks par bann endividi. Rezon pour sa, se ki nou rekonnet ki bokou endividi pe investir dan zot prop lavenir e osi zot fanmir e retir depandans lo sistenm Gouvernman.

Alors, Gouvernman pe travay lo en nouvo striktir taks lo saler, pou entrodwir bann dediksyon parey depans ki sa bann endividi i fer lo lekol prive zot zanfan, depans lasante ki zot fer, kontribisyon adisyonnal lo pansyon volonter, lentere ki zot peye lo *loan* lakaz, okenn lasirans ki zot pran pour medikal ouswa lakaz, e lentere ki zot peye lo bann *loan* edikasyonnel.

Mr Speaker, sa bann striktir parey i egziste dan bann

lezot pei. Sa nouvo striktir pou ganny fer an de faz:

□ An 2026, tou bann endividi pou anrezistre avek Komisyon Reveni Sesel.

□ An 2027, nou pou konmans sa nouvo striktir taks lo saler ek benefis non-monneter pou lentrodiksyon en deklarasyon taks par bann endividi e anmenn bann dediksyon an fors.

Lannen 2025, pou dedye konman konsiltasyon e preparasyon ek sekter prive, afen ki tou travayer i konpran byen sa reform. Nou bi se pou senplifye e retir okenn konplikasyon, sirtou an servan sistenm teknolozi pou fasilite sa reform. 49

25.2 Retir ‘*Withholding* taks’ ki aplikab lo bann lenvestisman dan Sekter Lekonomi Nimerik pour senk an.

Mr Speaker, Gouvernman pe kontinyen ankouraz plis bann lakonpanyen pou servi teknolozi pli avanse ki nou a kapab donn en servis pli aksesib nou popilasyon. Sa i touzour anliny avek nou stratezi transformasyon nimerik.

Alors pou ankouraz bann lezot lenvestisman sorti dan bann lezot pei dan sekter lekonomi nimerik, e osi akseler

lenvestisman dan devlopman teknolozi, Gouvernman pou retir '*withholding* taks' 15% ki aplikab ozordi lo bann servis teknikal ki ganny donnen par bann lakonpanyen aletranze dan sekter lekonomi nimerik. Sa egzansyon pou dir pour 5 an. Nou enplor bann lakonpanyen pou pran sa benefis pour sa prosen 5 an e investir dan teknolozi.

25.3 Revizyon dan '*accelerated amortisation*' pour bann lenvestisman dan '*software*' dan Sekter Lekonomi Nimerik pou ariv trwa an.

Nou osi pou revwar '*accelerated amortisation*' pour bann lenvestisman dan devlopman teknolozi prensipalman '*software*'. '*Accelerated amortisation*' i en metod ki ganny servi dan biznes taks pou dedwir en pli gran porsyon son depans dan bann premye lannen son lenvestisman.

Pou azout en lot benefis dan sekter lekonomi nimerik e ankouraz plis lenvestisman dan sa sekter, Gouvernman pou enplimant sa '*accelerated amortisation*' pour bann lenvestisman dan devlopman teknolozi prensipalman '*software*', pou ariv 3 an selman. Sa benefis pou selman dir pour en peryod 5 an.

25.4 Retir '*Withholding tax*' lo lentera ki bann endividi i resevwar lo bann lenvestisman dan bann '*fixed deposits*' avek bann lakonpanyen finansyel Mr Speaker, ozordi i annan bann lenstriman finansyel ki '*withholding taks*' i aplikab ziska 15% lo sa lentera. Avan ki en labank komersyal i pey sa endividi son lentera, sa labank komersyal i dedwir sa '*withholding taks*' e pey Konmisyon Reveni Sesel e apre pey sa endividi sa diferans.

Ozordi endividi ki investir dan bann lakonpanyen e ganny peye en '*dividend*' ouswa investir dan '*treasury bills* ou *bonds*', zot ganny peye sa lentera ouswa '*return*' san ki '*withholding taks*' i aplikab lo sa bann kalite lenvestisman. Alors sa endividi i resevwar son '*return*' lo sa lenvestisman an antye san okenn dediksyon pour taks.

Mr Speaker, pou ankouraz plis opsyon pou investir dan bann lezot lenstriman finansyel par bann endividi, nou pe retir '*withholding taks*' 5% lo bann '*fixed deposits*' ki bann endividi i investir avek bann lenstitisyon finansyel.

25.5 Revi dan alawenns personnel lo erport :

Mr Speaker, Gouvernman pe reviz alawenns personnel lo komodite ki en vwayazer i kapab antre Sesel dan pei. Ozordi sa limit i SR 5000 pour en vwayazer par lao 18 an e SR 3000 pour enn ki par anba 18 an. Sa i nepli reflekte larealite ozordi anvi sanzman ki'n annan dan pri.

Baze lo bann norm enternasyonal e pri komodite Gouvernman pe reviz regilasyon 'customs management (passenger allowance)' ek lezot lezislasyon. E Nouvo alawenns personnel en vwayazer pou konm swivan;

- En vwayazer pou aprezan kapab antre avek en lekipman elektronik ki enkli en telefonn portab, ouswa en 'laptop' ouswa tablet;
- Bann lezot komodite pour en lavaler SR 15,000 pour bann vwayazer par lao 18 an; e
- Bann lezot komodite pour en lavaler SR 8,000 pour bann vwayazer par anba 18 an;

(APPLAUSE)

MINISTER NAADIR HASSAN

Sa pou pran lefe le 01 Zanvye 2025.

25.6 To Taks lo bann antite ki ofer Servis Byen Vertyel ouswa

'*Virtual Asset Providers Licensees*' anba Lalwa Taks Biznes:

Mr Speaker, an Septanm 2024, sa Lalwa ki met sa lankadremen laysenns pour bann antite ki ofer servis byen vertyel, ti vin an mars. Sa bann antite i annan ziska le 31 Desanm 2024 pou fer en aplikasyon pour en laysenns avek Lotorite Servis Finansyel. Gouvernman pou aplik en to taks 1.5% lo 'assessable income' lo tou bann antite ki ofer Servis Byen Vertyel. Sa to taks i menm to taks ki egziste ozordi pou bann antite 'securities dealers' dan sekter finansyel.

25.7 Lamannman dan Lalwa Taks Valer Azoute '*Value Added Tax*:'

Mr Speaker, apre konsiltasyon ek sekter prive, Gouvernman pe anmenn lamannman dan Lalwa Taks Valer Azoute, pou fer sir bann provizyon anba sa lezislasyon i pli kler pou enterprete.

Premye konponan se pou adres konsern e fer li pli kler ki 'levies' i reste endepandan avek evalyasyon bann lezot taks. Pou osi annan lentrodiksyon en '*input tax credit schedule*' pou tranzaksyon ki egal ou par lao SR 50,000. Nou osi pou revwar

prosedir ‘*refund*’ ki enkli akimilasyon kredi pa plis ki 3 mwan.

Bann prosedir pou anrezistre en biznes anba sistenm volonter, pou ganny revwar avek lentansyon pou detekte okenn ka frod, ouswa reveni ki kapab pa ganny kolekte. Sa bann lamannman pou osi entrodwir en peryod tranzisyonnal ki bann biznes i kapab sorti anba sistenm VAT.

25. 8 Ranforsi Lalwa Ladministrasyon Reveni

i. Ranforsi Lezislasyon pou Bord ki govern bann lazans taks e ladwann ‘*TACAB*’

Mr Speaker, nou pe osi al ranforsi lezislasyon Bord ki govern bann lazans taks ek ladwann, koni koman *TACAB*. Lentansyon sa bann lamannman se pou revwar bann provizyon pou ranforsi plis pouwar Bord *TACAB*. Sa i ava ede ki *TACAB* a kapab fer en lenvestigasyon ler in resevwar en alegasyon sorti kot en biznes ouswa Komisyon Reveni Sesel.

Souvandfwa, en lazans ki donn servis taks en biznes, i fer malonnet e pa soumet bann dokiman nesaser kot SRC pour son kliyan. Sa i fer ki sa kliyan i bezwen pey bann sirsaz. En kod kondwit pour sa bann

lazans ek bann sanksyon pou ganny etabli. E osi bann provizyon konman en lazans i kapab ganny sispann.

ii. Ranforsi bann lezot provizyon anba Lalwa Ladministrasyon Reveni :

Mr Speaker, Gouvernman pe al ranforsi bann lezot provizyon anba Lalwa Ladministrasyon Reveni. Premye konponan se pou donn Komisyon Reveni Sesel pouwar pou enpoz bann sanksyon administratif pour bann lofans ki ganny komet. Sa bann sanksyon pou monneter e i pou vin en mezir adisyonnal pou SRC servi kont bann lofans ki pe ganny komet.

Dezyenm konponan bann lamannman pou relye ek proses ki ganny servi pou ‘*recover*’ det ki en ‘*taxpayer*’ in akimile. En biznes i kapab obzekte en desizyon, si zot pa satisfè avek sa desizyon. Responsabilite i lo sa biznes pou prouve ki sa analiz ki SRC in fer pa zistifye baze avek bann dokiman konkret.

Me souvandfwa dokiman adisyonnal i ganny soumet par bout zis pou retard peyman dapre analiz ki’n ganny fer. Alors, lamannman pou ganny propoze pou fer monte kantite zour, nou donn en biznes pou

soumet en lobzekasyon. Sa a sorti 60 zour pou vin 90 zour.

Nou pe osi entrodwir kantite letan ki Komisyon Reveni i annan pou travay lo sa lobzekasyon ler zot in resevwar. Sa i 128 zour. Nou pe osi enkli bann provizyon pour en biznes pey porsyon sa det ki pann ganny obzekte.

25.9 Ranforsi Lalwa Taks Biznes:

Mr Speaker, an Desanm 2022, en revè ti ganny fer lo bann benefis non monneter anba Lalwa Taks lo saler e non-monneter. Alors depi Zanvye 2023, sa bann benefis i ganny takse lo sa kou aktyel, ouswa lo valer takse dapre sa Lalwa. En biznes i selman kapab dedwir sa bann benefis non-monneter anba Lalwa Biznes Taks, selman lo valer ki'n ganny takse anba katriyenm "schedule" taks lo saler e non-monneter.

Alors nou pou propoz lamannman pou fer ki sa kou aktyel i ganny kouver osi dan depans, ki kapab ganny dedikasyon anba lalwa taks biznes. Dan bann lenstans kot sa kou aktyel i pa kler, sa valer ki'n ganny servi anba katriyenm "schedule" i kapab ganny servi.

Anba Lalwa Taks lo biznes, i annan bann depans ki

ou pa kapab fer dedikasyon anba ou reveni biznes. Sa i enkli taks biznes ki ou'n peye. Me nou bezwen klarifye ki bann lezot taks parey "tourism marketing" taks, taks valer azoute, e taks ki ou'n peye lo saler e non-monneter pa kapab ganny azoute dan ou depans osi.

An Zanvye 2023, nouvo provizyon pour ranplas seksyon 54 dan Lalwa Taks Biznes lo "Transfer Pricing" ti vin an viger. An Oktob 2023, regilasyon anba Lalwa Taks Biznes pour bann dokimantasyon "Transfer Pricing" ti ganny pibliye. Baze lo sa bann provizyon, Komisyoner Zeneral kot SRC ki determin sa benefis "transfer pricing".

Okenn obligasyon pa ganny mete lo sa biznes pou vwar si en azisteman avek son deklarasyon taks i bezwen ganny fer, menm si nou rezim taks i baze lo en "self-assessment". Alors bann lamannman pou ganny propoze pou klarifye sa bann provizyon. En lamannman pou osi ganny propoze pou entrodwir en "transfer pricing schedules", en "schedule" depresyasyon e osi en "schedule" pou kapab vwar bann peyman an deor Sesel.

26. Konklizyon:

Mr Speaker, an konklizyon, mon oule retourn lo

konmansman mon diskour, kot mon'n met lanfaz ki atraver tou Bidze ki nou Gouvernman in travay lo la, in montre klerman ki nou annan en stratezi tre kler pour nou pei. Nou reste touzour responsab e disiplin dan nou depans. Nou demann avek tou dimoun pou travay dir pou kontinyen fer agrandi nou lekonomi. E ler lespas fiskal i permet nou redistribye sa sikse avek tou dimoun. Nou pou kontinyen lo sa menm trazektwar.

Mr Speaker, mon kapab dir avek pep Seselwa ki Bidze 2025, i enn ki Pozitiv, ki adres e ki pe tous tou sekter nou sosyete. Bidze 2025 i laprev ki Gouvernman i annan en stratezi kler, realistik e konnen ki i pe fer. Koman en nasyon nou bezwen kontinyen lo sa semen pozitivite.

Mr Speaker, mon oule remerci Prezidan La Repiblik, Mr Wavel Ramkalawan pour son gidans ek sipor dan formilasyon sa Bidze, kot in ekout byen e valoriz ekspertiz teknisyen dan nou Ladministrasyon.

Mon osi remerci Vis Prezidan, tou mon bann koleg Minis, bann minister, departman ek lazans ki'n kontribye ver preparasyon Bidze 2025. Mon

osi remerci Lasanble Nasyonal pour zot sipor pandan lannen.

Pour tou Seselwa, de lapar Gouvernman, mon osi dir zot merci pour zot travay dir pandan sa bann dernyen lannen ki'n ede relans nou lekonomi e ozordi zot pe zourir sa sikse.

Pour *staff* mon Minister, mon'n toultan dir e mon pou kontinyen repete ki zot devouman ver zot travay e zot nivo profesyonnalizm i '*second to none*'! De lapar Prezidan e tou manm sa Ladministrasyon mon dir zot en gro merci.

(APPLAUSE)

MINISTER NAADIR HASSAN

Mr Speaker, mon fini parey mon ti konmanse "ozordi nou dan en sityasyon kot nou kapab prezant pli gro Bidze dan listwar Sesel. Mr Spiker sa in arive dan mwens ki 5 an. En Bidze ki donn avek nou pep benefis nou travay e osi met disponib larzan pou investir dan lenfrastruktir ekonomik ek sosyal, ki a benefis nou pei pour sa bann lannen e deseni ki pe vini."

Avek Sa, Mr Speaker, mon rekomande ki sa, "*Appropriation Bill 2025*" pour en Bidze SR 11,901,621,045 pou otoriz depans dan

'*Consolidated Fund*' pou lannen 2025, i ganny aprouve. Mersi Mr Speaker.

(The LDS Members gave Minister Hassan a standing ovation)

MR SPEAKER

Mersi Minis pou ou prezantasyon mon osi rekonnet lo lapar Lasanble travay Minister Finans e bann teknisyen dan preparasyon sa Bidze ki gid depans Gouvernman pou lannen prosenn.

Mon oule osi donn en remersiman spesyal lo Lasosyasyon dimoun avek Dezabilite Tande pou lenterpretasyon an langaz Siny sa Bidze ki en premye pou Lasanble e mon krwar sa i fer li en moman remarkab, menm istorik pou Lasanble. E en zefor ki nou pou kontinyen seye anmennen.

Bon, nou'n ariv a lafen sa sesyon la. Mon oule dir ki zis rappel *Assembly Business Committee* ki nou pou zwenn dan dizon 12:10 avek bann zofisye Finans, pou etabli program, konsiderasyon Bidze dan Staz Komite.

Avek sa mon remersi bann Manm pou zot latansyon e nou piblik an deor ki'n swiv nou e mon swet zot bonn fenn

lazournen. Mersi. Lasanble i *adjourn* ziskan Mardi le 5 Novanm 9 er bomaten pou deba lo Bidze.

(ADJOURNMENT)